

CINDHAMASO

Eretriyat cindhamaso kee darasahi aglet majalla

Maaziya 2018
Nibro 6

- Sawwaag akxini!
- Qiraaya, hammi teelo!
- Cindhamasoyti zizzaale, ardi lel baskat qafu kinni!
- Ninni nabse, cilleh naarhago!
- 2018, tillabte muddahi waacinalle





Eretriyat Cindhamaso kee Darasat Aglehi Majalla

Maaziya 2018

Dhibrho

<i>Santisheeni farto</i>	3
<i>Aglet Watsam</i>	3
<i>Zatet barnaamij yinqiyyime</i>	
<i>Cindhamasot Gondo</i>	6
<i>2018, tillabte muddahi waacinalle</i>	
<i>Wassanosnan kayetta bukkusse giraare</i>	
<i>Cindhamasoyta kee arde</i>	
<i>Qiraaya kee tee nafaaca</i>	
<i>Ninni nabsehi irhga</i>	
<i>Nagra</i>	14
<i>Taarik nagra 2nd af</i>	
<i>Mihra kee uray</i>	17
<i>Farhi kee abitto tustuwemko, dhiiciminnexem mitane</i>	
<i>Dooda</i>	22
<i>Marcat cayda kee labcad</i>	
<i>Cayda kee cijaajinna</i>	23
<i>Zizzaale kee nummat</i>	
<i>Sin farhi Afti xak</i>	
<i>Sawwaag akxini</i>	

Santisheena

Suleeman Maxammad

Kabisheenit

Jamaal Maxammad

Cabdu Maxammad

Cusman Nuur

Shuqhle abshiiisheeni

Mesfin Gebrehiwet

Agoogisheeni Dizayin

Kamaal Diino

Leyawut

Suraafiyel Tesfabrukh

Ta majallalle litin mablo, farto yakko ayra ta kataya cinwaanah noh dhirhiyanta.
Gaab noh isho!

Cindhamasot Majalla

Fartot Sanduqhih Nibro 1042

Talafoon 202592

Faakis 125981

Imeyil: menesey@eriyouth.org

Majalla Tayfiddigem

Talafoon 125394

Santisheeni farto

Xishmale qaari:

Saaho Eretriyalle geytimta 9 luqhaako inketta tekkeh, Afro-aasiyahi luqhat xawazko, kushti xakadde geytimta. Saaho ta tabbuxute addat gadda (cayda, sugte, labcad, cibba, taarik...a. ra) baclasso, dhuwudhdho, gannaaxishsho kee ijooko ijolle tillallaabishsho hidhdhah, qaalti luqhaako, kutuub luqhalle tanabo alle tane. Tayim abto dhictam lel, tee wannun bisah kinon. Ta luqha farhe cirheh kutuubuh sigtemko kambih wuli 203 iggidiya takkem (1814ko) sugteh tane. Ta iggiditidde laakin, tee wannun tee dhawrho kee ayfaadadde aaginale afto liiyiniinih, looni? Ta luqhah shiix sagala bool boxortomoonat erherhidde xarfi akah yekkeh, madaarisille andurrusi tane. Darsi ammatalle yane mari (darasa kee mudarrisiin) lel, dagih tee yaqhrawna kee akah yaktaboona dhiican. Aki macalsiita inkeeketta kee makaatibiddee yane dago maraako beexin mari laakin, amahidhdha kinon aknarhxo mirhicna.

Ta darsi abittohi ammatalle yane mara kee aniinnexe marah, fertoh lel cindhamaso tasgalle “Eretriyat Cindhamaso kee Darasat Aglehi Majalla” awci tanemhi sabbatah, ummanti gaba adde assagallik ishafto abo dhiica. Ta majalla, 5it cindhamasot mahrajaan waqhtedde Xamle, 2012 towce riish kin majallah erhedhdheh, nibro 1-5 fanah tinthibbice. Iggidalle lamma waqhte kinni lel, tanthibbicem. Akkinnan thabca, lixa alsak sarrah tawco alle tane macna lel kinni. Yakko kiyah, farhe (mathbacat caawiino kee akimti) sabab, caawiino akki tanem mudhdhug kinni. Ta caawiino farhe gabooko tekkeh laakin, cafuuka akah esserno miraacen kinni. Amaa gedda lel, tee ilaltah bar kee lallecih waacinsittamak, ta saadifih nelle mabbarhina aynuk cafuuka nuyshukumek sarrah, (Aglet Watsam, Cindhamasot Gondo, Nagra, Mihra kee Uray, Dooda, Cayda kee cijaajinna kee Xoosal) camidih le nibro 6 inshaallah Maaziya, 2018 jabaa sinak narhxe.

Inki gaba miginnaacishsha akah yaanaakah, ta ciyo ummantihiitiya kinamhi sabbatah, tee nabnedde ummanti ishafto yaallo alle tane. Amaa gedda lel, ishafto abto fadhdha saculuk, ta majallalle yomxowweh yane maanafof macnaaha, sanduqh nibro kee emeyilti araxah gaba tassagalloonaa sin naczime.

Erherh thabcahi zacabah mablol noh toxoy sacul yinin. Amaa mablol kabbatneyaako abittodde ashishno kiyah, ten mablol leddi majallalle nayballaw aarhigi nineya laakin, barhsime sababah maabino. Kado fanah farheginah aybulluwekkah sugnemih cafuuka essernak lel, ta kado tawce majallalle litin mablol yakko ayrah hambarerna. Amaa noh taxayin mablolulle cilleh alle namnaafaco kee 7th thabcalle nayballaw kinomuh lel, nookomeh ahde sayna.

Gaba yasgallitti afto nabatiya kinni. Nanu ta asqirribi tane simaagillekke, nishuqli maglleshnan busa kiyah, shuqli umman marahitiya, majalla lel, nabaatih umman marahi bada kinam naarhigem mecem kinni. Amaa gedda lel, hayya umman marakke, gaba adde nasgallo. Amiitinnan kutuub lel, ishiishi farhshishnan kee aftiino balih saw kinamah nookomeh ahde sinah sayna.

Aklet Watsam

Suleeman Maxammad

Zatet barnaamij yinqiyyime

Eretriyat cindhamaso kee darasat agle, abinnan ayqarir taqhiyyimem dherh waqhteeko cayda balih tibbirheh sugte mece labcad kinni. Ta aqhayyam lel, ishiishi darajah, ten tablemhi angolla kee tine xagarahi masarratah kinni akki sugeh akki yanem. Ta araxah lel, Maggaabit 19, 2015ko erherhisheh, ta tillaabe lammiggida, barhsime siyaasaayin, agleeyin, maqhriixin kee caydaayin zacob yibbirheh umman lamma baxuurooko akki sugte inkiddehi zate kee rakbi barnaamij yinqiyyime. Ta zate kee rakbi barnaamijidde, wuli 5000 takkem addangali, zate kee adhdhadhdhaxti abittot abita sugen.

Ta barnaamijik, naba xasaab raxeena kee aywajjahti abittot akah yaalleekah akkabaanamadde, sirii xawal esseramhi bukadde, kabisheenit kee tangalemhi geytodde yakkeedo mango guba agana kee xawal suge. Agle amaa gedda, amaa barnaamijti selimam kee amaa barnaamij addase sareegallat aqhayyamah, wuli 30 takke kabisheenit



kee hurtuukin yangalit amaa barnaamijtiya adde yengelin zatet rakbe abo, Sayni 24, 2017h, maxtabrhat barnaamij abeh yine. Aqhayyamah yamco hidhdhah, amaa barnaamijti maglellisheenit, amaa barnaamijti eneb eneeb ya selimam, sittiyah iggid barnaamijti masarratah yaallo alle yine cirhe kee wacyeh yumbulluwe andafof uyshurhurh isheenih arureh kab akah ishaanaakah kinni tekkem. Amaa kabye aruredde, xussuume amaa barnaamijti masarraatin selimamko wulim lel:

- Cindhamaso, barhsime zoobaballe, cibrar kee irhga yassabadaadaloona arax akah fakkiimo

- Cindhamaso, umbaka ardi xaajadde lon idhdhaaget xafisheenih, sinni xasaab kee mablol cado qalbeh kabishitoona arax akah fakkiimo

- C i n d h a m a s o , sinni dhic yayballawna kee yaqhayyamoona aydukumumoona

- Cindhamaso, barhsime zoobaayin kee caalaamin zacobudde sinnirhga

yayfaddanoona

- Irhga kee masxassasti babti ayfaddanah

- Cindhamasot idhdhaaget umman ginah xafishaanam

- Cindhamasot ayfaraa yaynabiinim

Ta barnaamij bukaako ummantiya arxibishoo kiyah, fertoh laakin, amaa barhsime nabareenit, kubbaaniyit, asxadaadar kee aki ardi dhishoshudde geytimta cindhamasot shaqqaalat asgolladde hammiteh kinni ashtuqhuli sugem.

Osah ta barnaamijti selima, yangalitti wahasnan busa makiiki, zatet kabentadde, kabisheenit male, maglellisheenitih, cibrat aqhmashti bab akah fakkitaakah abaanam gantah kiitine.

Wuliili zoobaballe tamuqquce xaaja/zacab, polisit darajah axaasab fadhdham yekkeh geytimemko, ten yable maraalih zatteya akah yafeedede arax fakkiimo hidhdhah dufuffu abaanam yakkeedo amaa barnaamijti selimamko wulitiya kiitine.

Ta tamuqquce selimahi masarratah amaydo, ta barnaamijidde deecimimta kabisheenit, ta kataytamko wulim taskimilem akah yakkiiniikah akki suge.

- Yamuqquce zacabti mihraayin yakko cibraayin dhic/irhga lem

- Tay basoh farhshiisha

idhdhorh abteh taarhige dhiiceenit

- Ardi ginodde afto yaallo dhiica kitoob arureh tuturgumeh kabishsho dhic lem

- Kattaabeen kee cijaajeenit

- Ardi addalle tane diplomaasiyuun kee aki irot mara

- Cindhamaso kee dambarti kawaadira

Ta araxah lel, ta tillaabe lammiggidadde kabte 48 suuratya ishiishi cawdah tambulluwe waqhte:

- Siyaasat zacabah 21 = 43.75%

- Agle/jamciyat zacabah 14 = 29.16%

- Caydat zacabah 8 = 16.6%

- Maqhrix zacabah 5 = 10.4% kiyyine.

Ta kabye arure kin taqhaariirille, yangalitko makkolem kee yanfice xasaab kee mablol yomxowwe. Amaa tillabtemko fidinam kee yayshe araxah dhuguugulo lel, wasiya tomxowwe. Amaa kabye nuqhothko wulim lel ta kataytam kinni.

- Ta barnaamij soolekkah, lammiggidahi waqhteh dhuguugulo dhiicem, amaa maglelliyyamhi selimat utkahi bahge kee yekke xawal kinamhi sabbatah, dhawrhuma/yamxaffazo,

- Arxibime zacabti manga kee cayna, taydurusem

kee hirigtam kiitinem, waqhteeko waqtelle ossiimak adii tine yangalitti manga tash-hidem kinamhi sabbatah, niiroh bohosa maleh adde yamshuqqulem farhshishsho kinni.

- Amaa barnaamij adde yakke reedi madiinat fanalle dhishshiimetiya yakkem busa makiiki, amaa reedi winyoo akki yine xawal, amaa barnaamijti farhshishsho gannaaxishsham kinam,

Ta agana xussuumeh yane nuqhoth, dhawrhumto/tamxaffazo alle tane eneb eneeb tam yekkeh, aymociya fadhdham kee tanqayyamo alle tanemko wulim lel:

- Sokooko yambulluwe agagsa hin kabisheenitti dhic kee amaa kabishan zacab macalso farha.

- Barnaamij adde erherhisha waqhte kee adde abayshima waqhti waadix akke wayam

- Amaa yakke barnaamijidde, yangalitti qalbe caadin mablolti wayto, yangalitti caynadde dooreenit akke wayaanam kee babti maglelliyeenitti tanto takko dhictamhi sabbatah, macalso fadhdham kinni.

- Barnaamij Asmaralle busa akki yanemhi sabbatah, aki zoobaballe geytimta mango cindhamasoh geyshiisheenit (Telefiziyoona, raadiyo, jariida, aglet weebsayit...) ti araxah tillallaabo alle tane.

- Kabisheenitti goron/thalab buxtah yakkem hidhdhah,

maktab/dhishot
yakkeedo.

- Ta waraaqhut (idhdhot waraaqhut)ko mangom farhshishsham, inki waqhte kabyeh biyayshimamko, barhsime makaanonulle malammit/maddaxit waqhte kabyoo caashir geyaado.

- Fertoh zatet cirhe yabbarho hidhdhah, kabisheenitih yamxawwe waqhti, 30 daqhiqhyaako ammange waya gedda yayshe.

- Ta barnaamij mangole mari miyaarhigemhi sabbatah, masxassasti tillaabishnanadde cilleh adde yamshuqquleedo... ..a.ra kiiyine.

Amaa taqhyiimille, mangom kee yanfice xasaab kee mablol kabye. Agle lel, amaa kabye mablol unkoh missil araxah tibbirheh, abittodde ashishsho kinam kee ta Asmaralle busa

araxah

yudhdhurheh suge barnaamij, aki zoobaballe yanfaddago xagara tanem amaa saadifille caddoye.

Aki ginah, ta tillaabe 2017ya iggidadde yekke aglet shuqhlehi taqhyiimih yakkeedo, Taxsaas 2017 ti abrhadde rakhbi yekke. Amaa rakhbelle lel, 2017ti ayqarir (tine xagara, yine waddiror kee tine tanto) cilleh tinqiyyimeh, 2018ti fidin xgara firsimte. Ta yekke taqhyiim, agle tookomeh koonaa iggidah macnah aykee 2021 fanah teyyeece xagarat erherh iggidahim yakkeedo kiiyine.

Agle, 2018ya iggidah teyyeece xagaradde, cindhamasot siyaasaayin idhdhaaget kee angollahi aynobiyah akki suge xagarar kee ayqarir yefeededeh dhuguugulo, kulliiyadde erherheh suge kaadiirat

aydaras kee uguugus dimacle araxah dhuguugulo, agani darajahi darasat fastivaala kulliyat darasahi daraja kee qadre gannaaxishsham tekkehanqarrabo, Saawalle yakke 8it fastivaal, andhadhdhosti giraareelih yimseeneeh akah yadiyeekah yakko, yinqirribe taqhyiim cirhelle, shaqqaala kee kaadiirat maglleshnanadde cilleh alle yamshaqqalo, barhsimte mihrahi darse geyte cindhamaso, amaa darse abittoh akah yayballawna dhiican caashir akah yankallaqho, madaaris kee kulliiyadde yamxawwe aytaxaaxad kee uguugusnan darsi yanabo, cindhamaso, fertoh lel darasa darsedde hammiteenih akah aydukumumaanaakah yakkoona....a.ra tarhxem adde tane.



Cindhamasot Gondo

Suleeman Maxammad

2018, tillabte muddahi waacinalle

Bilinnan iggidahi
erherhidde, tillabte
mudda yastintiniinim kee
yamiite waqtehi zacabah
yamxeesebiinim, dherh
waqhteeko taahe yane xiyawti
barhahi labcad kinni. Amay
kinam hidhdhalle lel, 2018ya
iggidadde adde aacitinuk nane
waqhtedde, leddelle gaxneh
tillabte mudda astintininuk,
kaa waacinalle lel amaa adde
saynak nane iggidi aagina
yaallo dhiicam, cindhamasot
majalla noh taymikniyem
farhshishsham kinni.

Ta tillaabe 26 iggidiya,
Eretriyat ummat sirii
curtaw kee giraare essere
cereeregin waqte kiiyinem,
ummantiyaako sucuttam
makin. Ta xussuume
iggiditidde isticmaarko
yinwirrise, umman caynaha
dumtem kee baaxite addat
kayre kee qadri bukalle,
irooko haruuruguma,
Eretriyat ummatih agadadde
yomootokeh burbur yekke
qaradit kee ayshineenitti
gerrac loyyimteh bakittam
kiimitine. Ta qaraditko wuli
caddoweh yambulluwe
misaal, xurriyat ubkahi
mamalxanit iggidadde,
taateyimekkah silo kin
ninnardehi dhisho kee



andhadhhosti miradadde
abbirhinuk, nellobte
caskaarinam kee fidin beela
kinni. Yakko kiyah, ta
ayshineenitti gerrac, Eretriyat
ummat kee doola, fertoh lel,
shohodat amaana shakkayitte
cindhamasot giraareh butureh
addase makko mitine.

Amaa beela, xoolaysha
araxah abayshimte waqte
yakkeedo, amaa qaradit
kee gobbit maabayshimo.
Caalamti qaanunuddehi
muxutuh, Eretriya kee tee
shacabti bukalle yekke
cagab sucso kee qaanunkohi
kudnanah xadde hin
xulkak kataye. Dhaw nok
yucbuteenih kee nikoboreenih
yakko niyixlikeenih, ninni
nabsehi deesot xaqqe

kee agada nok xaragoona
acikkininnixon xulka kee uma
xibar miyine. Eretriyat ummat
baaxa kee cululuh, amay
balih maqhrixih yixsireh
ararito kee yamnacabo kee
dulo, naba andhadhhosti
wafraakohi gonfoiyishnanko
erherhishsheh, irolle mara
nummat ishi dimbihi
mawcooko, ishahleh fara
solaadit dagomti deesoh
raacekkah yekke yiqhlile
cakanan mibiyayshiima.
Nummatti aybaadamah
yimxiggire, nicindhamasohi
bukalle akki suge dulusnan
cagab, ardi addahi amne kee
samarat dorokkasnanah akki
suge cakanan, diplomaasin
zibbosnan kee gashlah
dufuffuuh yekke aracmats

hido durug, arde, ummat kee kaa masuuleen karaahiya kee anfangah akki suge axaasabti uguugus ...a.ra gaxneh nastintine waqhte, ruhuu aluukat darib xabtam makin. Ta umbaka qaradit kee gobbitti selima akim makinki, nanu arde kee shacab balik, dhic kee qadre neynebeh ninne dhicnamko andafishsham kee leddelle tadabbem kinam lel, mudhdhug kinni.

Ta qaradit kee gobbit, Eretriyat arde kee shacabti bukalle aziya hido salaba xabeh yakko dhiico kiyah, abayshimolle laakin, ninasreh gommeime aknarhxo dhicna. Ummaniko aganalle, Eretriyahi shacab afaadad kee miradko wulidhdha andafisheh yakko kiyah, niiroh yaxlako kee niya xabshiisheh gululluubuso mirhiicinna. Nitaarikidde, tayim cusubam makin. Eretriyat ummat, farhe andafofuh thaalicitekkah, ishaarax yibbirheh selima gufam kee ishi gerho nasreh gomam lel, kaa labcad hido cayda kinni. Ta cusub giraare lel, nitaarikih osat miizan adde osseh tane.

Amaa gedda, tayidhdhole giraare kee cakanat waqhtek sarrah, naaniina aagina taallo kinni? Yamiite waqhteh bukaako, fertoh lel 2018h ayim ilalno dhicna? Bukaakohi waanishnanah, amaa sirii curtaw essere xawal kee giraaret waqhti nasreh gommeimeh, ninni giraare kee shuqhlehi orba adde

geyna waqhte gufneh nanem, umbaka duho dhiicatiyah caddummih timmingideh tane. Tayim taythummutemih lel, xadde hin misaal kabyoo dhiica. Ummantiyak akah naarhigeekeh, ardi ginot shuqhli, tonkoteetem kee xadde hin jahah lem, kee waqhte kee kayre, nabaatih lel, lillat shuqhle esserta abitto kinni. Ta tillaabe zabaan rubucudde, Eretriyat shacab kee doolat lillat xawalti sabbatah, daddagomuh aakili suge afaadad lel, ta adde nane waqhtedde awlalle niyayfakano dhiicamhi ammat noh yaxaw erherhisheh yane. 2018 amaydo, ninni qarradoweenit hido gobbisheenit taanishneh, ninni beeraqh/bandeera xafishneh adde waneeniina iggida yekkeh, aki waqhteeko ferta damaana kee yindhibbirhe caashir nibbirheh adde oroba nane iggida kinni narhxe gedda, rummaako mirixtem akkekkah, amaa yane adda kee wakali xaalaat isheh adde madara waqhte kinni.

Maqhriixin nabintahi ammat

Tillaabe iggiditidde, rigid-cirhehiginodde, tambulluwem kee yandhibbirhe tirir masarrat akah sidishna naba shuqhle niysilixeh kino. Amayko wulim lel, istrateejin rawurti ginnanah ardi darajah layti askaalti ninni qadre xaf ishno dhicnem kinni. Andhadhhosti Ayrodhdhumat zooba kee

zaazaalle, istrateejin nabam kee fantat rawurti ginnan, maxras baarhot ayfaddan kee ramacishnan kee masnot rigid-cirhehi sidishnanadde naba shuqhli yekkeh yane. Ta sidishnan tandhibbirhe mawcolle tabo hidhdhah, osat wafra kee shuqhle farho kiyah, tay fanah yekkeh yane shuqhli, nabam kee fadhdhitimtam kinni. Maxras ayqarir, waqhti baahe masnot araxalle nayfaadado nirhicshiisha masarraatin rigid-cirhi, miciido siddishimeh yane macna kinni. Ta ninni xawalah hayne sidi, niiroh macaashah ninne dhicnamadde darattowinnixinuk, haddig yanqoomote, barhsimte caynahi zariicat orba naynabo, bahaayimti gadda kee kaa mawco sassanosno, kee Agro Indastirit dhishosh naynabo lino cukra kee naba qadre, tindhibbirhe mawcolle taybiddilem kinni. Tayimlih lel, bahaayimti gaddahi sassanosnanadde, tillaabe iggidaako taahe sirii xawal akki yane. 2018 amaydo, ta sirii xawalah ramacye zariicat rigid-cirhi, maqhriixin nabintadde yaallo dhiica dufuwo cadih niyaybulluwe iffowe niirohi ifee yakko dhiicamhi ammatosnan amaydo, waqhahacishsham makin.

Eretriyat ummatih selima bukaako, martiinot aymamac, gaddaalit kee baaxentitti fanalle mango barhsa hin wayto kee sarroynanko naggoyteh, dhicta martiino

santishsha tefeede dooda dhishaanam kinni. Ta selimahi gufnanah, ardentitti masarraatin xiyaawinnat xaqqeh yumbulluweh, barhsime jamceeyin kadaamam, biyayshiimeh suge wakalitih aftiino amxawwi, umbaka dooda leemitto hidhdhah sirii xawal kee wafri akki sugeh yane. Ta ardi darajah yakke wafrahi mawcoh, amaa xiyaawinnat nabintahi masarrat kin darse kee caafiyatah iggidin kadaamamadde yekke shuqhlil, ruhuwam makin. Kaafa Eretriyalle, darsedde jinse kee darajat leela feela mitane, darsi bakte geyinnexe ardenti yane narhxo lel mirhicna. Xiyaw qadrehi aynobiyah ugute fidin xagararti akkadaami kee mihraayin darseh lel, shiixah loyyimta cindhamaso darse kee tacliim bakte geyeenih, tayshe irhga kee dhic yikkitiinih amaa ardeeyin wafradde angali yanin. Xikkiminnat gabooko nable gedda, shacab ishiishi wakalille masarraatin caafiyat kadaama geyo dhiiceh yane. Xikkiminnat gabooko tumbulluweh tane nabinta shaahid farhinnexem tekkeh, caalamti caafiyat dhishoshko yakkeedo naba fayla geyteh tane. Ta jamceeyin kadaamadde akki suge wafri, yamiite waqhtedde naba maksab kinni yaallo kinam. Amay lel, ardentit, fertoh lel cindhamasot qadre kee ayfaraa taynabem kinamhi sabbatah, maqhriixin nabintadde yaallo

dhiica afto nabatiya kinni.

Aki jamceeyin kadaamam macnah; masgaacazit kee geysheesheennitti kadaamamti ayfaddag, tamcube qarcele layhi asqarrab, kahrabat asqarrab kee ayfaddag...a.ra dagum dagumuh ambulluwi sugeh yane afaadad ruhuwam makin. Cindham kee naba rawurti ginnan kee celwat fatnanah, xiyaw kee medderoh layti damaanahi aythammatadde ashtuqhuli suge dhishoshti araxah, Eretriyat barritko 80%ko aganalle takkem, lay ishiishi wakalille geyo dhiiceh yane. Mudunti layti masarraatin xalli geytimo yakkeedo, naba dhishoshti araxah sirii xawal akki sugeh, akki yane.

Kaafa Eretriyalle, taamo tamco, tsirga adde orobinnexe hido masgaacazitti kadaama geyinnexe wakali yane narhxo mirhicna. Talafoon kadaama gufinnexe makaano yakkeedo mitanem balih kinni. Kahrabat ayfaddag, naba wafra kee shuqhle fadhdham yakko kiyah, farhe cilsaalih, kahraba mudunko tillabteh barritille tanfaddago xawal dhuguuguluh addakki sugeh, addakki yane. Ayrodhdhumat andhadhhosti zooballe, Teseneeko aykee Karkabat dhagan tinfiddigeh tane, fidin wakalit agoogishsha kahrabat kadaama masalan, amaa mirixta kin makaanonulle kahrabat ayfaddagah akki sugi sirii xawalti misaal kinni. 100 miliyoonya takkemih

Xirgiigot kahrabat raxeenat aynobiya kee ayfaddanah yekke wafri yakkeedo, suge kahrabat waqhaaqhac hido urhaarhet aftaxadde ishafto yaallo kinni.

Ta andhadhhosti shuqhlitti agaagalle, 2016ti erherhidde, waraqhat soldihi aybaddalah erherhishe cirheeyin maqhriixin aymamac, makro maqhriixin damaanahi ginnan kee qaanuunin araxti ayfaadad dhicshiisha araxhi sidishnan, soldit fandagal gerhgerh, kee cadaaga kee sharfi dhawrho kee as-hadaadde digira yane afto caddummih iggidintiya kinni. Aki tayhi agaagalle tadiyahem lel, carwat kiraahi limo kee akimti araaqhab/zuunan gantah yakko kinni. Daraja darajah akki yane, xokomat shaqqaalahi maahiyat aymamac makkodde aso hidhdhah, cadaagat as-hadaa Fadhdhitima. 2018dde lel, xokomat shaqqaalahi maahiyat aymamac kaamilik yakko, aftiino akah tomxowweh tane.

Bukaako Eretriyat maqhrix, baanoyshe ugute daqhte kee andafof cursuusutak tarisheh, tharbatsle nabinta adde yaymazgabo dhiica darajalle tabeh yane aknoo dhicna. Abaa sugne andhadhhosti shuqhlit, fidin anfaddag leyam lel, ishuulahi naba waddiro kinni. Xiyaawin kee caydaayin afaadad, ardeeyin samara kee inkettiinodde digira afto yakkeedo ruhuutiya makin. Ta araxah lel, siddishimeh

yane masarrat gibidtiya kee hiddayetiya kinni aknarhxo dhicna. Taginale xaalatadde, macaadin kee badti gaddah iggidin tabiicat muhdehi goron kee shuqhli ossiimak yedeemko, nimaqhriixin nabintahi quwa kee afaadatti afi waqhteelih

aagina bahto lemhi ammatos w a q h a a q h a c i s h s h a m makkale. Nabintat haruurugo taxiddidem umman gedda, masarrat tiraare/hida kinni. Eretriyat maqhrix miradak, amaa aki dowlitimko barhsimtem akkabta xaaja tane. Amay lel, mango

waqhaaqhako giraareh tabteh temeete nabinta kinamhi sabbatah kinni. Xadde hin gobbit kee waqhaaqhako tabeh yemeete maqhrix lel, amaa xatxat kee dhagsoh yemeete maqhrixko aganalle niirohi damaana yaallo dhiicam mudhdhug kinni.

Wassanosnan kayetta bukkusse giraare

Eretriyat ummat, kaa yeseedefe cilish qarade kee gobbit, sirii curtaw kee idhdhaagetih garayeyaako rummahim kee qaanuunin araxalle yigrirah, kee diplomaasiiko wassanooso ugute xadde hin xulkak rimidko bukkuseh, yookat diplomaasiin geytimnanadde ishi ahliino kee garaa ummantiyaalih yeymemeeceh yayfiddinimidde gantah yinsireh kinni. Eretriya ummat, ta umman cayna kee umman gabooko kaa aseedefi suge qarade, xulkak kee gobbitko giraareh tabeh kee siriiginah yushtuqhuleh, tharbatsle nabinta kee marto mareenat badale adde baaha daraja gufeh yane. Wassanosti kayetta bukkuseh lel, zoobat darajah yakko caalamti darajah diplomaasiin geytimnan kee tsamudehi ayfaddanadde geytima. 2018ya iggidi amaydo, siyaasa



kee diplomaasit gabooko gantah, amaa tillaabe iggiditko ferih gibid cara nibbirheh adde saya nane iggida kinni. Ta darajadde lel, zooba kee caalamti darajah qarceleem kee agaagite madhdheena nakluqhem kee xattishimnan daraja nayfiddinem, addat andhadhdhosti xagarah xato kinam thummut kinni. Ta adde saya nane 2018 amaydo, amaa dhayille anqoomoti nane iffowe niiro gufno hidhdhah, ninni xawal kee afi

osneh, adde tarishna, shuqhle kee tharbatsle nabintahi iggida kinni. Ummanti akah jaarhigeekeh, nabinta tharbatsishsham lamma xaaja kinni. Amay lel, ardentitti ayfaraa kee dhishoowin dhicti aynobiya kinni. Amay kinamhi sabbatah lel, ta iggidi ardentit, fertoh lel cindhamasot silishnan iggida yakko kinni. Amayeh lel, aftiino kee erherh hammi akah yomxowweh yane.

Cindhamasoyta kee arde

Ardi sabbatah umman gedda amaxeesebe, amaa xasaab lel, cindhamasoytaako kiyo erherhisham. Cindhamasoyta kee ardi sittaako barhsiminnexe, inki santiimhi lamma gaza kinni. Lamma tenhi aniina, ishe isheh yakkeedo tii tiya hinnim maacil akmale. Cindhamasoyta hin ardehi monnowa macna male. Arde hin cindhamasoyti yakkeedo xaaxaalle dhirhiyen xasar kinni yakkem. Ten madhdhuwi tagina kinamhi sabbaah lel, ten fanadde aggricinnexe gibid silsilat maraba adda dherhiya tane.

Arde kee cindhamasoyti lon kaxani feerak feero kee yanabo dhiicemko, lamma tena tarhuwe silsila tirirtiya kee damaanaletiya takke. Amaa rummi tatiya kinamhi sabbatah, arde tamxurruse dhage balih, cindhamasoyta lel, xarastaa balih beyna. Xarastaa xayaat umman gedda ishi dhageelih kinni. Yaxruse, yagulgule, yazree, yagushshee, yaytsihee, orbisha. Tay lel, kaako fadhdhitima abittot kee xawal kinni. Ishardeh laakin, tayko aganalle kinni akah abam. Xaddeeko feere imaan kayyalle le. Karmadde xalma atteleyih, carraz kee culullih, ilaw buuredde gama. Elle xarhe dhage sassanosseh akah tadabbo kinam lel, cille mecetih yaamine. Ilaalem akah maakke tah, iggidi tillaabeh malammit iggida gabbaacemih, isharde kee ishi dhageelih le kaxani cadur miyanbiddile. Feere xawal



katattaasankah, akuulalle miifaara. Aki takalelih cokka yaxayiinin macna lem takkeh akah mitambulluwe. Baarho takkeedo, zaban yaxay gedda, kaa takxise. Tayko nafhimem tinniyemko lel, arde kee cindhamasoyta lon madhdhuwi ayidhdha fanah kinam caddossam takkeh yodde tamaabbe.

Wuliili gedda, cindhamasoyti zizzaale balih, ardi lel baska adde takke qafu balih yakkeh yoh yambulluwe. Zizzaale, tee selima mudhdhug kinni. Baska abaanam kinni abayshimot tee selima. Qafu dhawurhaanam yakkeedo inkimih inti sirim akkishinnexe tee ciyo kinni. Ummanim salaaxah abtamhi sabbatah, abayshimalle geyta orbi xayishsham yakko ciloh ciyo xazxaazitta. Combooba bahtam, lay guurtam, qafu dhawudhdham kee ...a.ra lel takke. Tayidhdhole xawalti gomeena lel, baska takke. Baska geyteh betto makinaaki, tee migac yaabbiinin isheh nabse ruf ishishsha kalima kinni. Zizzaale, sirii ginah xawalta, qafu takkeedo ishi abte xawalti limo kin baska akah taxfize. Inkoh aben xawal kee taaniyi lel, baskalle yanbiddileh tablemko nabam male. Tayko uguteh able gedda, cindhamasoyta kee ardi zamoodinni zizzaale kee qafuhi zamoodinno balih yakkeh yoh yambulluwe.

Arde kee cindhamasoyta tarhxe suura, umman ginah caddooso dhiice dhaarhiyo. Yakko kiyah, ookomeh xusem isheh ishe caddossam kinni. Cindhamasoyta kee arde yaanam amaydo, naba macnale suura kinni. Eretriyat cindhamasoyti, irooko yakke zulme kee caduu khayaana duhe gedda ayim abe? Xaqqe amo haw kee ishi ardi siyaada jabartimto abe xawal makko hinam akyekke gedda, silaax yaaqhuciiinim doore. Yibbirhe arax lel, xurriyalle kaa baahe gedda lee, ayeh yirhicto arhxe waye? Tamaa xurriyat limo kin agmirhinnexe baskayto beeto yemreredde beedol ay takko hadane? Uguto dhiica

esseror mangum yakko dhiica. Yakko kiyah, kaa medebbo inketta kee caddummih iggidintiya kinni. Ardi, cindhamasoytaako bextih aki dhish male. Kaa bad kee baarho, xangol kee golal, duduuba kee sittiyadde ardi ummanna yiyriisheh, xishamadde akah martaakah abati cindhamasoyta bisa kinni.

Tay marto mareenah akah yaydoomeh, sassanoosati, abayshimolle isharde cizze sarishah, xurriyah damas yakketi, cindhamasoyta kinni. Kaa kaxanoh qalbe xaba ummatah tamcube lay, bettimta macaasha kee meggerra akah yekkeh, yekke xawal, limodde garaasati lacin laflafalle

yane cindhamasoyta kinni. Tayko nafhimem tinniyemko lel, cindhamasoyta kee ardehi gibid zamoodinni ayidhdha tiriram taythummutem kinni. Cindhamsoyti yudruseh ardi yafaadado, cindhamasoyti riyaadalle agiro yekkeh isharde niyaatisho, cindhamasoyti war-hado letiya yekkeh, ardi jabarimo, kee umman tay tablemhi zimma kinni. Cindhamasoyti umman gedda, zizzaale balih, ishardehi siyaada dhawrreh, marto mareenah xishmatimatiya akkabo kinam lel, shakkishsham makin.

Jamaal Maxammad Axmaddiin

Ninni nabsehi irhga

"Inki caduu aalle waytemko, alle tamidhdhige xaalah inkim malto macna kinni" (Powul Niwman)

Mango marakke, mango xiyawhi xaal naarhigeh, mango maraalih nameerhege. Atu miyatto/ö kito? Tarhxe essero nelle tamiite gedda laakin, ninni migac kee cumreeko ferta ninni nabsehi gondo warishsho dhictamak mimangino. Ninni maxyeenimhi martiinodde huftole nabra tillaabishno nekkemko laakin, erherh meceerherhih ninni nabse cilleh naarhago nelle tane. Atu miyatto/ö kito? Barhä woole gomboo? Numaa woole labhattoo? Inaa woole abbaa? Sacalaa woole sacalaa? Darasattoo woole mudarrisii? Ardentoo woole gwaanaytoo? Xuggattoo woole gerhentaa? Kaxantooli woole caduu? Saaxibi woole? Amayimko fernih lel, ninni nabse ta kataytam kee akimhi addadde cilleh naysharhaarhago dhicnaa kala?

Anu:

Raxmattali kiyo, woole raxmatta

malii? Lilligtiya kiyo, woole dahankaakuu? Aki marahi gidcat afhime, woole macal mali kiyo? Gidcat waqhte, aaginah agrire? Inni zooba, aaginah abbirhe? Inni nabseeko, awlahi karima kixiniyo? Awlahi karima lee nicibiyo? Xiyawko lee, aaginale mara kixiniyo? Aaginale mara lee nicibiyo? Amaa kixiniyo xiyawtoh ammagado, aaginale taror beya? Amaa nicibiyo xiyawtooko deelito lee aaginale taror beya? Attiminniye martiino tillaabisho hidhdhah, aaginale anqaraarab aba?

Nirhgahi balima, tamaa ninni nabsehi zacabah lino irhga takko alle tane. Masalan: Akkinnan xiyawti dherhtiya kinam kee urhurhtiya kinam ishek jaarhago dhiicemko, intilet kucussodde (basketball) dimac yaallo dhiicam kee mirhiicam akkanih selo dhiica. Aki mari nibukalle lon mablo noobbih gantah, ninni nabsehi irhga nayfaddano dhicna. Yakko kiyah, mango marakke ninabsehi sabbatah aki mari noh yaxayin mablo/nasaaxa andhaxsinno

gulgul minakke.

"Ayrimna gedda ninni nabseeko kiilo miteera mirix narhxe, faylitimna gedda laakin ninni nabsehi fugtooko mixayinna." Aleksander Soljintisen

Noh tamxawwe ayra kee fayla agaagalle noobbih abittodde asishno dhicnemko, xadde hin darse akko geynam shakke male. Darsi afaadadi masarrat kinamhi sabbatah lel, nudrusemko afaadadi roora nabbirhe. Wuliili gedda ninni nabsehi zacabah umam naabbem mifandhah nakke, nitaaziyem yakko gantah dhiica. Yakko kiyah, nikixin mara kee noh xaaliita maraako win nedde ayinnexe ayra nelle temeetemko, dintih nitanficem kee afaadadi arax nitayrhibirhem kinamah shakkinno nelle mitane. Amaa ayra cado qalbeh kabbatnam, sorhak sugnem nitayshadhdhago dhicta. Amaa ayra macalsho andhaxsinnek sarrah, abittodde ashishaanam nettah ractam kinni. Unkoh abittodde ashishe waynemih, umbuki aluukat intih nublih laakin akko ercinno

nelle mitane. Amaa ayrah akah aamine waynemko, ninni kalxit darib katayno dhicna. Nidarib bol fanah nisantisha sugeh yekkemko laakin, jaha nasqayyaro miraacen kinni.

Tayimhi cakseh mangole mari, faylat macal malooni. Nanu tayimko aagina kino? Aki mari nifaylisha gedda, siknah kabbatnaa woole nayboloolowe? Gari nifaylisha gedda, niyat nedde yamaabbem mudhdhug kinni. Yakko kiyah, wuliili waqhte zirabti fayla nitasaadafo kee nitaskalatho dhictamhi sabbatah, xeela fadhdhitimta. Fayla, ayboloolowinnixinuk akah taneekah siknih kabbatno nelle mitane. Ayra takko, fayla yayboloolowiinim kee tanficem akko beyaanah, anficinnexem akko cidaanam lel, wannah ractam kinni. Amaa gedda lel, xaaja naybalaalaw kee nanfaw dhicno hidhdhah, ninni nabsehi irhga nifarhshishsha.

Naarhige xiyaw nitaseedefa waqhte, ten caafiyat kee ahlehi zacabah ten esserna. Ninni nabsehi irhga kee aqhayyamah lee ninni nabse essernaa? Ninni nabseelih zatteynih, ninni nabra naymaaco xikit yarhxe marakke ayidhdha nakke kala? Ninni nabse essernak kee ninni nabseelih xiggaynak laakin, ninni nabse, ninni xuggit, zoobit hido saaxiibaalih makin naybalaalaw nelle tanem. Miyaalihi bisa? Ninni nabse, ninnaabitto kee ninni xaallih kino, naybalaalaw nelle tanem. Amayim lel ta kataya esseror ninne essernak naqhaaso dhicna. Masalan:

Inni darselle aaginah aniyo? Inni maxyeenimti uray, ayidhdha

dhagan axiggire? Akkinnan ayqaridde, ayidhdha dhagan mece niya kee xamaasah uguta? Liyo dhic kee mottoxowwalle, aaginah alle amneefefe? Inni maxyeenimti urayidde, aaginale sareegalla liyo? Inni maxyeenimti uray, ayidhdha dhagan aqhiyyime? Akkinnan ayqaridde geya nasre/sareegallah, ayidhdha dhagan alagge? Inni dhamto kee xaruqhi dhawrholle, aagina kiyo? Inni maxyeenimti martiinodde, mangole waqhte xedeneena kiyoo, woole xazzanoweenaa? Inni dhamto kee mablolti caddosulle aagina kiyo? Xiyaw mablo kee faw, ayidhdha dhagan aabbe? Inni nabsehi ayfaadad/aynobiya, ayidhdha dhagan ashtuqhule? Akkinnan urayhi abittoh, ayidhdha dhagan inne admine? Inni zoobaalih, aaginale geytimnan kee zamoodiino liyo? Inni zoobaalih, aaginah adhdhadhdhaaxe/atfeeheme? Inni zooba, ayidhdha dhagan xata? Inni doodahi cayda, sugte, cibba, labcad.....a.ra, ayidhdha dhagan xishmata? Inni doodahi ayfaadadadde aaginale afto liyo?

Amaydo, yimlie caafiyat irarnih, ninni maxyeenimti urayidde sareegalla le martiino naallo hidhdhah, nabsi caafiyat, imaan caafiyat, dhamtot caafiyat kee hammi caafiyat irarno dhicno nelle tane. Amayim lel, ta kataytamhi abittoh takko dhicta. Masalan:

Akkinnan uray xagarah abaanam; Win nedde yarhxe waqhte, asborti yakko aki waqhti tillaabishti xaaja macalsitaanam kee andhaxsiitaanam; Akkinnan uray, mece niya kee farhah abaanam; Aglet uray

kee ayqariridde yangaliinim (mangala yakkiinim); Diin kee cayda xishmataanam; Doodat urayidde, sinnafto yaalliinim hido sinni gaba yasgalliinim; Akkinnan urayih yalaggiinim; Akkinnan uray yaqhiyyimiinim; Yekke kalath yaalimiinim; Lekkin yaxiggiriinim; Ankootowinnexem, sabreh ilaalaanam kee katattayaanam; Nabsi ayfaadad/aynobiya xawalaanam; Akkinnan urayidde, curtaw kee ankalaalab yaybulluwiinim; Mablol kee faw, cado qalbeh kabbaataanam; Zoobit kee xuggitlih, sanaaya kee samarah maraanam; Maxyeenimti uray kee nabradde, xedeneenit yakkiinim; Akkinnan mablohi mottoxowwa kee adhdhadhdhaxadde, hidaayah yangaliinim ...a.ra fadhdhitimta.

Abayshimolle, umbaka sareegalla kee mece martiino amo, ninnuuray xedennak abnam kinni. Ninnuuray xedennak abno hidhdhah lel, umman gedda uma bar cursuusunno kee niya nakkataw, kee nixedenishsham kee nixazzanossa xaaja cilleh naysharhaarhago nelle tane. Tayim lel, umman gedda, xedeneenit kee sareegallalit nokkabto kinni. Xedeneenit kee sareegallalit nekkemko lel, mece nabra kee martiino santishnam mudhdhug kinni. Amaydo, ninni nabse cilleh naarhago!!!

"Ummanimko yashshe saaxib hido ummanimko sirii caduu nadda kinni" Ingiliiz missila

(Mulubir-haan Habtegeriyel, 2007:1-6)

Suleeman Maxammad

Qiraaya kee tee nafaaca

Xiyawti barhi ishi xayaatadde laazim abo alle tanem kee ishi farhih abam tane. Masalan: Ta alle tanitokkeeko akuulalle kallaxtam kufarhidde cikittam kinni. Mango kitoob yaqhiriinim kee mango irhgah darabbowaanam laakin laazim takko alle tanemko wulim kinni. Amay ayeh nemko lel, xiyawti barhi akkinnan daqhihihadde geya masxassas, khibraa kee irhgah yanqeesemhi sabbatah kinni.

“Qiraaya hammi teelo kinni,” tarhxe waani umman gedda nabatiya takko kiyah, xiyaadde, teelo fadhdham garba kiyah xangal teeloh farham male, tarhxem miwaytimaana. Nixangal garba balih felite wayemko, akkinnanim abno noh miyasmixem laakin, naarhago nelle tane. Cijaajinnat qalom kee siilit alle nane caalamti wasfe sahalah naarhago nixattam yakke gedda, kitoob laakin, kaa naqhraw farhi neellemko darat hin marabadde sayisha, tedeeh bakitinnexem kee igiiloh abayshinnexem irhga kee khibrat badko cullumtayah niyaylagge. Qiraaya cale kee jinse barhishinnexah cayda balih nabbarho missilam takko kiyah, fertoh lee cindhamasoh taxay nafaaca kee fakta caashirko wuli dagum xusno. Amay lel: Ferta lillaage kee war-hado iraarishsha. Qiraaya nixayaatadde le gide, talle abayshimta akyaanam makin. Maxti nabradde lillaage neynebehe, umbaka xaaja ifanih nifhimeh missil taro beyno nirhichshishshatya lel kinni.

Maxadde lino saacotko qiraayah waqhte akah barhishneh niqhreemko, darselle agiira nakke. Feere fahme kee bukaakohi irhga kitiyah lem nakko lel nixatta. Waqhteelih nixayaat arbacimak carsimnamhi sabbatah, ninneh farhinnanille nadaw kee nakko farhnam nakko yekkemko lel, irhga kee masxassas hinnim guffutumtam makim niyayshidhdhige. Xayaatadde xurtaame kee ufay xeewanti xiyawti barha taseedefemko kinni. Qiraaya laakin taymhi aysassakadde naba gide leya.

Kitaab naqhriye gedda, makiina ullo kee daaballe marsha asqeyeeyeri akah tadiyeekah, nixangal yakkeedo amay kinni yakkem. Kitoobti

qiraaya maxyeenimti nabradde niyaseedefe farhshiishinnexe uma xasaab yakko, ufay xeewantiiko naggoosa mece labcad kinni. Fertoh lee qalbi raxam yakko raaxa yaxay sissik kitoob dhinko basolle yaqhiriinimhi labcad iraraanam, ufay xeewantiiko yaybirree labcad kinni. Ta ardi yane caalamalle, martiino aki waqhteeko ferih arda kee shaqhladde tanemhi sabbatah, inkim eddabto tantamadde tahlikemko, kitoob aqhrii hidaaya kee amnelle baaha arax doorit. Kitaabko geyna faw kee asxossi lel, xayaat hidaayadde naba afto letya kinni. Amaa gedda, qiraaya aymidde nitanfice?

Fahme kee xasaab ayfaadadadde

Kaningham akyan jaamicadde tekke idhdho, qaariin sinni idhdhaaget naw ishak yaseedefe waqhaaqhac ifanih yayrahawna ten dhichshishsham warishsha.

Zikrat ayfaadadadde le afto

Xiyaadde, tillabtem xunsusso waytamakke mango mara nakke. Talafoona kee bariid looh higgidinam makiiki, kaafit dhaxiinedde ay nufthurem sodhdhamakke midagino. Qiraaya katattaasaanam lel, zaakirat aynobiyadde naba afto leyam caddoosan maarhagit.

Taakamo missilam yayshukumiinim


Nanu ay farhnam kee ay nakko nolle tanemhi sorha manno. Qiraaya lel, ninni nabsehi sabbatah aarhige waynam akah naarhigeekah kinni nokkabtam. Nixangaladde teketteh tane irhga kee masxassas wacishshah, ninni farhi afa kee sarrah waraarishno nixatta. Masalan: mooziqqat digir kixininomhi sabbatah, mooziqqa basak nedde tah takke. Kitaab yaqhiriinim laakin, aaginah mooziqqat digir yakkem niyascallamo dhiicam xunsutaanam farhshishsha. Cindhamaso, irhgat aqhmarsh kee umbaka badaleh gulgul kinoonimhi sabbatah, qiraayat labcad feroth xatam tena kinni. Amaa gedda cindhamasokke, kitaab saaxiiba nakko.

Jamaal Maxammad Axmaddiin

Nagra

Jamaal Maxammad

Taariikh nagra



Essero: Dottoor Xaddish yikhlithe, yokteh tinito. Usuk aymidde kinni yikhlithem? Amay sarrah lee ayim katayte?

Medebbo: Wuli Yohaalashet Girmay akyan Tigrayto yekkeh Wayyaaneelih adda addah ashtuqhuli yinetiya kinni; 5 iggida alle yuxkumiinih yinin. Xaddish khalath, kaa yaynazzamo beye taro kinni. Anu laakin, kaa shakkitak inemhi sabbatah, Xaddishik, ta xiyawtodde kab min; kaa xibabbar win yoh

aymiyane akke. Xaddish yok xine. Tati aarhacamo xiyawto kinni. Ayidhdhole macluumaat yoh yaxaytiya kinni. Kaako nastefedem mango yokye. Yohaalashet laakin, addalle caduulih ishi ciyo abita yine. Amaa xabsi masuullih geytimah, nimacluumat inkoh akah yaxay. Usun lel, xeelaatih ten macalsit. Fadhdhitimtam lel, unkoh aknoh bah akyan. Akyeenim aba yinemko wuli max, Xaddish Saniih ishi ciyoh orobe gedda, amalle kaa yibbirhin. Amakkeeko, Maryam gimbi fanah kaa been. Maryam gimbidde Xaddish kee Yohaalashet inki kameeradde ten sayishen.

Marmara akkabaa yiniinimko, 17 maxtiyaako sarrah, yettah yoh deecimen. Anu lel, xaddishlih ittisaal liikine. Meedaanko yollamiiti yine sirre inkoh aarhigi yine. Xaddish akah yaamano xineh, umaatih kaa yootokiinih sittiyadde nabsi adde duddube. Makiinadde kor yokyen. Kore gedda, amaa makiinadde Yohaalashet tenlih yoh suge. Firaash bishshiito kiyo, emeetem yokye. Xaddishlih inkidde namemhi sabbatah, ayim akkoh arhxo? yokye. Inki

caynah qadiya le mara inkidde mihaana. Anu amah yokye gedda, anu Xaddishlih ayim liyo? Anu Xaddish, xaakim balih kiyo kaa aarhigem. Aki ginah kaalih inkim mayyo akke. Amakkeeko yibeenih, kameera raqhma koonudde yisayshen. Saaca afarah Maryam gimbidde orobe. Saaca koonuh Ashshaagre yoh deecime. Ashshaagre, yalli raxmaako erece, yalli yenecele mujrim kin yamirmiri kinni.

Usuk yokya, “atu shacbiyaalih, Xaddishlih yakko Yohaalashetlih ittisaalaat liitinio. Lissac shacbiyaati xisaabko mawcito? Tenlih tanitom neerhgeh nane,” yokye. “Kalxaako shacbiyatto kitom naarhige. Kaadolee kokkabnam mannooki, tenlih liitine ittisaal noh warish,” yokye. Anu laakin, Xaddish xaakim balih kaa aarhige. Laxuuta gedda lel, diwa yoh yaxay; aki ginah kaalih liyom mayyo, akke. Masalan, foyya kin jiibko soldo bah yoktemko, koh axaw dhiica? Mirhiica. Kaadolee, anu yokkay tanitomko aarhigem mayyo akke. Radandah dhaban yokyootoke. “Beera texeesebeh amo,” yeh yirhirhiye. Leddi max yoh andhaxeh ellemeete. “Anu Xaddishlih taginale ciyo aba nine. Shacbiyaalih taginah geytimak ine noktemko, nanu kunasaamaxo kino. Inkim kok maabna,” yokye. Anu laakin, warisham mayyo, akke gedda marmarah yibee. Nibro baxar akyan marmarat nizaamah yiyeydedebbeh, taanam

fanah yiyootoke. Yaatuki, afadde abaxe gamid yok-hayeenih yiyaatukin. Umman yayyaaciinih waanish yokyan. Aarhigem mayyo, akka gedda lel, afadde yokyadabbiinih taanandah yiyaatukin. Lamma saaca takkem, yiyootokiinih aduu yokyen. Leddi max lel, amay balih. Taginah adooxa max sarra sarradde yiyootoke gedda, nabsi sittiyadde yok dommolay. Cawuleh inne sorhe gedda, inkim yedde geyinnixa akrabamko yeh, yixabe. Mafarrit max, abaxte layko temmeege barmiilidde afko ulloh yisayishe. Rabo kab erhxe. Amakkeeko alle gaxelle, lamma max inne sorhe. Qalbe xabe.

Makawwanit max laakin, sirredde akah geytima nine arax yinfittixeh, “kukood tatiya kinni. Abayshimot max kolle temeete farto tatiya kinni,” yokye. Ishi xurtaame yokyassaaco yeh kiyah, mece gedkoh ummanim yeerhgeh yine. “Beedal mudde, yoo alle afalle, akah tiyfiddine” ya missili yane. Ta beedol lel, farha yiniinim geyen. Yowalle akki tine marmara, koona maxko sarrah abayshimte. Maryam gimbidde 37 maxtiya kalemik sarrah, Sambal yiyedebbin. Sarrah, xurriya temeeteh xabseeko owce gedda, Xaddishlih sittiya geyne gedda kinni, amaa sirre aarhago dhiicem. Xaddish koona iggida yumudhdhuweh yowce. Kaa kissi alle yine fayil lel, akah yalayeeekah yekke. Wuli Xaddish ahienti, amaa Maryam gimbiiti naba masuuluh yine Getaččow geeh, “kaa magdafin kiyah,

walaa 20 iggidiya kaa uxkum,” akye. Hiin tay yaado lel, 10 shiix birya mangarah akah yoxoy gedda, amaa fayil baaha akyeh bish ishishe. Xaddishille lel, 5 iggida alle haye. Amay tekke gedda kiyah, inkoh alay dhaarhino. Thawwaali Qushet beenih naarishshuwe dhaarhen. 10 shiix geye gedda laakin, ummanim xabbishite.

Essero: Meedaanlih liitinin arax yiggirice?

Medebbo: Yoo yiggirice. Poliis araxah yakko xakaayimti araxah daddaguu macluumat geya nine. Awwal balih laakin, abno mirhiicino. Amay sarrah Sambal gaxneh, ninni jamaacaalih 8 alsa sittiya aydurusinuk kee sittiya xata tillaabishne. Lixya waraar “Qey kokob zemečča” kab ye gedda, Antonoov akyan roblaano Alembeqqagn nibeen.

Essero: Amayko basolle, Maxammad Cali Yuusuf akyan caskarti, Itobbiya kee tee maxaarho nabsi aknicibiya koolih yine. Usuk dhacumatiya kiiyinem kee abayshimolle kaa yarashshawna kaa beya, Cabdalla amaana kokyerhxem yoh warishsheh tinito. Akimille tabnamko basolle, Maxammad Cali Yuusuf miyatto kinni? Usuk kolle xabe amaana lee aymotta kiitinem noh caddosso?

Medebbo: Maxammad Cali Yuusuf, Jabhat Taxriir caskarto kiiyine. Masriiti jaamicaako khirriij lel kiiyine. 1960madde kinni Jabhat Taxriiridde yowcem. Axmad



Cabduulih Jihaazal Qadaadde akhdumi yine. Rummah dhic kee fidbe le agiro kin caskarto lel kiiyine. Usuk diktaddaako bextih, irolle; Sooriya, Ciraaqh kee Sacuudiyalle yakkeedo tanziim ciyo abak yine. 1980nadde laakin, Sacuudiyaako badtaaraxah Ingalalle oobeh, ishi dikidde garayeyaako Sacuudiya gaxo farhe gedda, jabha kaa kalitte. Yok maabina yaado, kaa taabbem migeyinna. Dik abeh ane; amaa dik lee xato farha yaneki, yixaba yeh akxinen. Amaa gedda, Jabhat Shacbiyalle yemeeteh, ishi gondo akah warishe. Usun lel, kurhirhiynemko, Jabhat Taxriirlih nangaaco kinomhi sabbatah, nelle mabbarhin. Tayedde sayno mirhicna akyen. Ummanim yissiciddire gedda lel, Gadamti gabolle wuli Faraara akyan makaanolle yemeete. Amalle akah sugte xiyaak, Tagoodalet arax yiyluwa akye.

Kaa xagara, Gaxtelayko, Saaxil faanih Soodaan orobo kinni kiitinem. Tagoodale gufe gedda laakin, caduu aksuge. Usuk

gabadda inkim liimiyyine. Lakalle kaa mudeenih lel kaa yibbirhin. Amakkeeko (salaasa ammistegnagnadde) kaa baaheenih kaa yasxakkamoona yen gedda, usuk rabbit mayshi liimiyinemhi sabbatah. alle hayinnan faashosh cida. Lekkin kaa yasxukkuumin, tenlih dhibbaw farha. Kaa yarhuwin; usuk ifanihko kaa yaskhaarajoona kinni farhak yinem. Ishi lillaako, Itobbiya nabsi akniciba. Ta mari nixiyaa bakteh. nibaarho teyleem, anu tamaraalihi? ya sirii darrac liiyine. Taginah salaasa ammistegnagnadde daguu waqhte sugemik sarrah, Sambal kaa baaheenih raqhma 10adde kaa sayshen.

Anu Sambal xabshedde say gedda, Maxammad Cali Yuusuf, amadde yoh suge. Amadde tinem, Carab miyaabbiinimhi sabbatah, aalih yatfaahamoona mirhiicinnooni. Anu emeeteh, kaa agaagalle defee gedda, amadde yoh sugte xiya, “yaakhe, ta xiyawti Saaho kee Carabi kinni dhiicamki, aalih haasaw” yokyen. Taginah wagro erherhishne. Anu inne akah warishe; usuk lel ishe yoh warishe. Kaa yeseedefe gedcat inkoh yoh warishe. Sirii karaahiya Itobbiyatiya liiyine. “Yaa Cabdalla, tay raba, rabiile raba kinniki, ta caskar baab faakan gedda, alle tirneh silaax akbeyneh aalih dhibbayno. Raacinnexe rabiiko akah gilixnam aymi? Wulim akcidneh mirabna?” yokkay yine. Taginah ninemko, 1981h Maaziyat alsadde, “Maxammad Cali,

ishi nuwaa tibbirheh owec” akyen. Tah kokyeenimko, gidfi saaca gufte macna kinni. Usuk laakin, ishi nuwaa amalle cideh, “Cabdalla amaana...amaana...” yokyeh yedeesh nelle migaxinna. Kaa yigdifin.

Anu, mudda xabsedde kaleh, xurriya tekkeh mu-abbadti xabseeko Eretriya gaxe gedda, kaa xiya wagiye. Kaa taarhigem laakin, migeyinniyo. Wuli gedda, march Caddiqhayyix edeesh, amalle aseh dhiine. Maddaxit max, gaxo erxeh attobusudde kore gedda, wuli casa xiyawto ikokulle Maxammad Cali Yuusufuh iggidiniya uble. Kab alleh salaam akke. Cabdalla kaliifa yokyan akke. Usuk lel, Cusmaan Muusa yokyan yokye. Amakkeeko, yaakhe, wuli kottah iggidin xiyawti xabshedde yoolih yine. Kaa migac lel, Maxammad Cali Yuusuf kinni. Kaa taarhige kela? akke. “Yisacal makiini? Yabbah saclih barha kinni yokye. Kaa gondo iski yoh warish,” lel yokye. Miimar abneh, sittiyaako barhsimne. Sarrat dhaxiine, ninni miimaralle sittiya geyneh wagroyshinne. Tine gondo inkoh akah warishe. Amay sarrah Balaza nedeeh, taginale xiyawti shahiid kinni. Taginale waqhtedde inkidde nine, erxeh, caduu yigdifem akah warishe. Shaahid bahneh lel, shahiid kinam niysibite. Amallanih, shahaada akah yoxoyin. Shohodat xaqke kee shahaada lel geye kaa dik.

Mihra kee Uray


Cusmaan Nuur

Farhi kee abitto tustuwemko, dhiicimin nexem mitane

Xishmale qaari, ta lixta thabcalle, garaa eelih abneh nanem, cindhmasoyta Sileeman Axmaddiin kinni. Usuk, xurriyaalih darse erherhishsheh tinjixe darasaako kinamhi sabbatah, ishi khiibraako noh xazo kaa warsimne gedda raadi noh yekkemih kaa naxmude. Usuk, Asmarat jaamicaako culuum siyaasiyah erherh digri, 10 iggidak sarrah lel, Taylandille amaa cawdah maajister abeh isharde akhdumi tanemko tiya kinni. Kaalih abne garaa lel, jabaa sinakna.

Essero: Erherhih Sileeman Axmaddiinlih nitaysharhaarhago? Sileeman Axmaddiin miyatto kinni?

Medebbo: Yimigac akah teekah Sileeman Axmaddiin kinni. Qooxayti guddalle geytimta diikaako, Dacaaro akyan dikille xarastuu kee saci ziwah yamnabarre dikko ooboke. Saafirat madrasadde lel, erhedhdhot daraja kee fanti darajaako lixya fasle udruse. Amayek sarraahit daraja nidikille mitinemhi sabbatah, Deqqimaxaarille dhiinishsha madrasadde malxinya fasleeko



erherhisheh, malammit daraja fanah abaase.

Essero: Deqqimaxaarille malammit daraja abassemik sarrah,

awlih iggidadde Saawa obte?

Medebbo: Saawa obnamko basolle, Deqqimaxaarille aninuk, mudarrisiin takko fadhdham tinniyemko, “TTI” orobeenih mudarrisiin yakkoona dhiican yaanam tine. Yakko kiyah, anu amay midoorinniyo. Saawa oobeh inni caashir ablem doore. Ta araxah lel, Saawa, 1999ya iggidadde oobe. Amaa waqhti, Eretriya, caduu alle faake dhibaako ishe taxfazo dhibadde tibbirheh tine waqhte kiiyine. umman umman ginah, amaa waqhti, icliish ayyine. Yakko kiyah, jaamica saanam yisoono kiitine. Amaylih lel, inni soonodde garaw inni dhic abak ine. Alxamdulillaah, tacliim abasnemik sarrah, jaamica sayishsha nuqhtha geemhi sabbatah, jaamica saw dhiice.

Essero: Marxaba Sileeman Axmaddiin, xawaleti ishi xawalti limo geyam, tinem kee tanem yakko kiyah, iski atu tedee dherh araxko aki mari darse geyoona dhiicaanamhi sabbatah, kaafit Sileemanalle tamaato abte xawal aagina kiiyinem noh caddosso?

Medebbo: Rumma kinni, yikhibraako xiyaa aktadraso dhictam yekkemko, inni khibra xazo waqhaaqhac mayyo. Talle ummanimko basolle tamaato alle tatiya, farhi kinni. Farhi ulah akkinnexah laakin, farhi kee abitto sittiyaalih tinniyemko, dhiiciminnexem mitane yaanam kinni yimablo. Xiyaa tizriyem kinni tattuxuffusem.

Abayshimat tee mawco lel, abte xawaladde cikittam kinni. Abte xawal rummah makko lem yekkemko, geyta mawcohi miizan amayti idhdha yakke. Talle naarhago nelle tanem laakin tane. Amay aych, xawal yakkeedo cayna leya. Dimacle ciyodde abta xawal kee xawal, xawal yekkeh alle raacamalle abta xawal yanem jaarhigiinim farhshishsho kinni. Innelle gaxa gedda lel, ookomeh akah erhxeekah, jaamcat daraja fanah darse katattaaso farhi, niya kee bahge liikine. Amayelle amaato lel, amayidhdhalle xawalak ine. Azaakarti nizaam xiyawtooko xiyawtolle barhshiimo dhiica. Atu aaginah azeekeri tinito? Awlih waqhte doora tinito? yokkay tinniyemko lel, anu muzaakarah dooram, maaxi bar kinni. Maaxalle azeekere gedda, yikabbatti dhic ummanimko naba. Amay lel, acrufeh maaxamhi sabbatah kinni. Yixangal yucrufeh maaxamhi sabbatah, akah kokkeekah kabbatti dhic leya. Rummah tazeekerem tabbarho tekkemko lel, kuxangal raaxa yaallo alle tane. Amaylih lel, nabse sukuun kalitta abayshinnixito xaaja tinniyemko, tookomeh amay cara tayrhabarho kolle yane. Abayshiminnexe xaaja wandhedhdhelille tane hanih, xangal xazxaazimeh yane hanih, lammam abto uguttemko, abta ciyo asot abitto marhictam teerhegeh, taakamo missilam tayshakamo kolle tane. Xangal ummanimko barii yakke saacadde abta muzaakara, walaa saacat abrha

takko, aki xisaablih andufulih 3:00 saaca kee 4:00 saacah abtamko doorintam kee dimac lem takkem naarhago nelle tane.

Aki ginah, barnaamijih xagara yassaaciinimhi labcad irarno nelle yane. Anda ay abnam naarhigem, adde ugunnamah salaaxa kinni. Darsedde yane darasayti, ummanim waqhteh abo alle tane. Imtixaan kab ya gedda takke merdo salaaxa mitaalleemhi sabbatah, missilam missil waqhtedde abno kinni nelle tanem. Amaa aba sugnem, macna lemidde asishneh nanemhi sabbatah, imtixaan yakko, aki lellecti nabradde andaraarab miyanemhi sabbatah, salaaxah aktabno dhicna.

Amay balih xiyaakke narhxem tane. Waqhte maka akah waynem, narhxe. Oddooniyalle laakin, ummanimko aganalle cadle le araxah kellimteh tanem, waqhte busa kinni. Oddooniyalle tanemih sittiyadde xuge maaxinnanim hidhdhalle, 24 saacatiya akah tomxowweh tane. Geyteh tane saacot laakin, asxadaadar farha. Meceetih tesxedeederemko, dimacle ciyo abto kito. Amay abtemko lel, nasri umman gedda kutiya kinni.

Essero: Akkinnan dooda, cindhamasoyta akah table intile. Amay ay kinni nerhxemko lel, cindhamasoyta akah naqhiyyimem xayli gabooko kinni. Cindhamasoyti, xaylale,

yardo dhiica, yashataqhalo dhiica, yaanam kinni. Tayko bextih, cindhamasoyta nemko, dhaggitinnexeh taaninnexe xangalih wanna kinni. Akkinnanim ifanihko yafhamo kee yabbarho kaa dhicshiisha xaylahi wanna kinamhi sabbatah, cindhamasoyti, ishi cumredde abo alle tane aktam ayim kinni tarhxe?

Medebbo: Rumma kinni, cindhamasoyta yan gedda, yaahumuh yadiyetiya, xisaab hintiya, gazi gabolle busa yardetiya balih beytam miwaytimaana. Yakko kiyah, anucindhamasoytaakahashrixe arax amah tamko barhsiim yatiya kinni. Cindhaane, niiroh tillasno lino xayaat qudra adde nackure waqhte kinni yaanam yimablo kinni. Amay, umman cayna takko dhicta. Niiri ishi xayaatalle tillasso litom kee tadaw lito araxalle kubahtam adde abta waqhte kinni. Amaa waqhtedde irartemih kito lel, beera yan maxadde tamnabarro dhictam. Amay lel, umman cayna takko dhicta. Xiyaa akah taneekah inki cawdalle matargidemhi sabbatah, diraasalle agiira kin mari, diraasa katattaasan. Mihralle agiira kin mari lel, amaa araxalle sinni xayaat yayfakanoona dhiican. Darsi laakin, ummanimih masarrat yekkeh, niiroh takko taxiggiremidde naba xato leyamhi sabbatah, diraasa baddaahishe waanam ummanimko doorimtam kinni. Cindhaanet waqhtedde, amaa cuzri umman ginaletiya



yakko dhiica. Akkinnan caashirih raddemko, niirohi kucaashir amayidhdho miyakke. Amay aye nemko lel, cindhi tinemko, tanabe. Caafiyat liitinemko tanta. Amayko tillabtah lel, baarriini kwaaleelah ishe tanta gedda, kumal abtem kutakhdumem taarhago kolle tane. Duminnexem tinniyemko lel, cindhih abitem busa kinni.

Essero: Tookomemlih tadiye essero kinni. Cindhamasoyti awlih waqhtedde kinni, isheh takkem doorito dhiicam?

Medebbo: Ta alle marna caalamalle, baniyaadamti ayim aba gedda kinni naajix yakkem, ay abe waa gedda lee khasraan yakkem nemko, ninne minaarhigemhi sabbatah, tay kinni, noo waqhaaqhacinna. Yakko kiyah, ninne nafattasho kinni nelle tanem. Anu ayedde saa gedda hido ay aba gedda naajix akko dhiica? yarhxe esseroruh ninne nagargaro nelle tane. Ninne nugurguremko, adde naydamaco dhicnam, noh ambulluwinnixah miracta. Ninne faracna gedda, geynam kee waynamah kinni lel nikhasaara kee nimaksab yamidhdhigem. Kuxayli alle yanem

taarhago kurhicshishsham lel, irhga kinamhi sabbatah, irhga sakkayita kee ayrikkiyinnexah ishe tagargaro kolle yane. Anu inne able gedda, erhedhdhot daraja abaasam fanah ustaaz yakkiinim basak yodday tine. Amayko tabeh, fanti darajadde lel, akim yoh tumbulluwe. Malammit darajaako sarrah yane waqtelle laakin, tamaa rummah yim kinni, anu hido taginalem abemko anjaxo dhiica akkam yoh tumbulluwemhi sabbatah, amaa araxalle edeeh, ta jaamica akah abaase culuum siyaasiyah amnaddago kee maajisteer darajalle amaato dhiice. Tah akah arhxem ayeh kinni, cumre kee diraasa osinnanin hidhdhalle, kuxisaab kee dhic feerah feeramhi sabbatah, rummah ishe taarhago naba caashir kinni geytam.

Nixayaa isheh, askaala balih kinni. Erherh tiyadde teecetemko, malamma koh tambulluwe. Malamhalle kortemko, maddaxa koh tambulluwe. Maddaxalle kortemko lel, mafarra koh tambulluwe. Tamaa askaalaako erherhtiya xabteh malammalle tabtemko, hido radda hido lee sandaldal tarhxe. Araxah alle tedeemko laakin, akah neekah amolle salaamah aktawco dhicta. Ta araxadde lel, aarhige waatinitom taarhigeh, afhime waa tinem tafhime. Nabih lel, cilmi bakitto male. Naabukemko aykee xaqqi care fanah kallaxnandah, yamcukkuretiya yakkeedo

kinni.

Essero: Amaa rummi, ay sugtetiya yakko kiyah, cindhamaso mango le gedda araxko mutstsuciya kinon dooraanam. Dhayih maal akgeyan arax kee dhayih ten farhille ten baaha arax kinon dooraanam. Tambulluwe gondo ifanihko ten wahassamhi sabbatah lel, amo akkinexamalle ardi yambulluwin. Sugusti bahgi assalaggaako beexinam akah mitambulluwe. Tay laakin, wandhedhdhelille xabtam kiyah, amo takkem makimhi sabbatah, cindhamaso amo akah takkemidde yamxaasaboona kee mece niiro yattacakkatoona hidhdhah, ay ten fayishsha?

Medebbo: Akah arhxi sugteekah, lamma xaaja kinni. Cindhamasoyti isheh caynaako amaa waqhtedde yablem busa kinni yaaminem. Nabati laakin, tinem jaarhige, tanem yable, niiroh tamaato dhictamko yakkeedo ammat yaalle. Cindhati laakin, ta xusa sugnem miyaarhige. Tay katayto kinni yah adde laxuutam male. Amay ayeh nemko, cindhatiya kinni. Cusubtiya kinni. Tillaasem male, adde garayem yakkeedo male. Amaa waqhtedde yablemko bextih, niiroh tay takko kinni akyam male. Tayko uguttamah lel, cindhamaso dheh solaadi yabbarhoona, yabloona kee yamballawna farhan. Tay wuli gabooko umam maki. Wuli gabooko table gedda laakin,

dawaam lem maki. Umman gedih taynabarre xaaja maki. Amay ayeh, digge le xaaja akah neekah, xayaat askaala yekkemko, tiya tiyah adde aaciti kinni amolle aknawco nelle tanem. Ta araxko beexin arax dortemko laakin, kuradrad yamco mirhiica. Masalan cumreh 15 iggidiyalle maal geyto hidhdhah, caafiyat shuqhle erherhishshemko, caafiyat umman gedih koolih mimaramhi sabbatah, amaa ginah umman gedih tadaw mirhicta. Anu inni fahmelle arhxem tinniyemko, oddooniyak dhacam taarhago, taxaggaro kee tixiggirem abittodde asishsho yekkemko, diraasat afto ummanimko nabatiya kinni. Caafiyat shuqhli waqhtiyanaah yakketiya kinni. Darsi laakin, umman gedih kuyakhdumetiya kinni. Oddooniyalle tanitom faanih, kucukradde mara gaddi yinniyemko, diraasa busa kinni. Gadda akyaanam lel, kaa kinni.

Essero: Cindhamaso inkoh arhxe waynemih, diraasa akah yaqheesin arax lon. Tudrusem ay geyte? Makiina malito, mece sara malito, mece nabra malito yaanamalle kinon xiyaak leelitaanam. Tay xaqqe kinni?

Medebbo: Usun abli yaniinim urhurh arax kinni. Missilah yaanam tane. “Afi barhcah abtem male”, yan. Digge kinamalle tamiitem, rummah xayaat askaalalle araxah tawcem kinni. Solaadi

nicimbam mitane. Mece nabra nicibam gantah mitane. Niirah takkem laakin, waqhte beyteh alle temeete arax busa kinni. Ditele barko tabteh beeradde abto litomuh xagara assaace waytemko, teyyeece xagara abittodde asishsho lee xawale waytemko, ditele dabbarko tabto mirhiicitomhi sabbatah, kuxayaa andafitta. Xayaa andafitemko lel, umman geedit darrac kinni kodde xabtam. Anu inni khibraako cindhamasoh xazam tinniyemko lel, xayaa xogod kee sibsib kinni. Tayko tabeenih tayshe nabralle yamaatoona yekkemko, digge le xawalah aban kitiya, digge le nabralle ten bahtatiya kinam yaarhagoona alle tane. Sabri xan saxitoona yekkiinimko, inketta kee inkarax ta arhxi sugetiya kinni.

Essero: Atu majisteer abto iroh tedeeth, akah tedeem abasseh isharde gaxteh tanito. Iski alle tedee baarholle amaa diraasa aagina kiitine?

Medebbo: Rumma kinni, maajisteer darseh irohedeehine. Amaa diraasa lel, tillabtemko tee barhishsha mangom adde mitine. Tillabtemhi kataso kiitinemhi sabbatah, mango waqhaaqhac lem kiimitine. Amay aye, ookomeh xayaat askaala kinni, erhxeh ine. Amaa askaalalle araxah alle adii sugemhi sabbatah, waqhaaqhacishshamah inkim adde mageyinniyo. Amaa diraasa, Taylandille kiitinemhi sabbatah kiyah, mango barhsah liitinem male. Amaa diraasa lel, jaamicadde akah abaase culuum siyaasiyaati khusuus

(specialization) kinni kiiyinem. Aki ginah, irolle tane xaaja ablo caashir yoh faktem kiitine. 10 iggidak sarrah diraasalle gaxo kiyah, yelle masrayinna. Jaamica akah abaaseekah, ta adde ane shuqhledde kiyo ciyo erherhishem. Adde ane shuqhli lel, Eretriyat irot macalhi nabareena kinni. Amaa shuqhli lel, udrusemlih tadiyem kinni. Iroh tadiye gedda, aarhige waatinemko mangomudde garayto dhicta. Yakko kiyah, tolle talle ayekkah akah edeem abemhi sabatah, ikhsirem mayyo.

Cindhamasoyti Sileeman Axmaddiin, xadaar wannaa kee cindhamti lammaahi abba kinni. Yalli akah xabo. Aamiin. Gaab noh isho!



Dooda

Jamaal Maxammad

Marcat cayda kee labcad

Sorma akyan qabiilalle, marcah tinqirribe dingil gubi ikok ciddah, gubi wagaba curta. Kallaako siraxte wuli galaalacin (xabazah iggidtiya) lel, amaa curte wagabadde diriirigolle hayta. Tee wagaba afiddini adiinnanim hidhdhalle lel, awwaalittiyaako eneeb yatiya adde hayta. Marcat max gufa gedda laakin, aba sugtem xabta. Tay lel, marcah takke carha mecnedde loyyintam tekkeh, wagabadde hayta galaalac-hi nabne kee cindhaane amaa akah yamxawwe dorudde gide leya. Wagabadde tane curumto nabatiya tekkemko, mango dor geyta. Amaa curumto cindhatiya tekkemko laakin, tee dor daggowa. Ummantiyadde kaa kaayim carha adde mece.

Tahiiti akyan jaziiralle sigtam, marca fadhdha barhähi guri coddadde cado xombooba hayta. Amaa barhä, timliishetiya tekkemko lel, amaa cado xombooba mizgi coddadde hayta. Borniyo kee kilabayti akyan kishoshulle,

bacla doorittam barhä kinni. Tee annon kee naba say tee sacol, barhi dik fanah yadiinih sin barha nibarhäh farhneh naneki, sin barha nooxuwa akyan. Marca takke gedda lel, gombi ishi care xabah ishi numahi diklih siga.

Bangilaadeshille, Siyam akyan qaanuun yane. Ta qaanuun diikat makaabon kee masxadaadarit marcishiminnexah 30 iggidtiya kalte insayitih yakke xiyawto baahaanah aban marcat arax kinni. Teyah yakke yeenih doorenti, walaa xadar wanna yakko, walaa amaa marca akxine wayo, qasbiyah marcishito qaanuun kaa yaamire. Marcah fadhdhitimtam, dik akah alifan. Marcayye kee kaa cindhamti mashaarif lel barhä dikih zimma yakke.

Januub Filibbinille mara ummat, saymari labeeto araxah yadabboona dhiican ya imaan loonimhi sabbatah, gabbabbaacita cagabah tankissise labeetoh bar xabte

sayto hido lel xiyawti akrabe gubna akah marcishitaakah aban. Tay xinati lel, lamma bakhte leya. Akyeenim kabbaatam hido lel, dikko haddanimam kiyah, aki xalle male.

Iraanalle, barhi dik sin barha nooxuwa yoonaa ciloh, barhä dikille yamiitin gedda, marcah farhan barhä teyya fadhdheh temeetemih, shaahi akah bahta. Bar yaggirice gedda lel, barhä dik caydarruusko temmeege xoggat barhi dikih yaxayin. Tay cayninnaasko mece yaanah yaxaynim kinni. Marcat lallec fanah, cibna andharh sara saritto tanqissibe. Marcat max, ahli macaalale marca akah takko attiminnii cibna kee marcayyeh naba magannaxit, shamca, baani, lalim kee tacaarif mecedde akah yasxeederin. Marcishiminnexe adooxa barhä lel, cado gamdedde yisqirribin shokkarko, mece faalah alle bururusan. Cibna, akah tinqirribe baskaako mayshaahadah ishi xiyawto afadde akah hayta.

Cayda kee Cijaajinna

Cabdu Maxammad

Zizzaale kee nummat

Xishmale qaari, inkoh akah naarhigeekah baniyaadamti udduuniyat garballe maro hidhdhah, wakale kee kayyalle geytimtam ishi nafacadde ashishemko taahe muddad tillaabeh yane. Ta araxah alle yamneefecemko tiya lel, zizzaale kinni. Zizzaale fertoh nummatlih le madhdhay lel, ummantiyalle nabatiya kinamhi sabbatah, waqhteelih tee nayfaadado kee tee baclaasa kee anoonita teeko geytimta nafaaca adde nassanabbe waqhti beera akkinnexah kaafa kinni. Ta saadifih lel, Sancafi cindha zooballe 2015 dhishshimte zizzaalet agle kee amaa aglet zoobit geenih yanin nafaaca kee yuybulluwiinih yanin afaadad caddoosa garaa, amaa aglet abba kin munaadil Abraahim Suleeman kee amaa aglet kattaab kin ustaaz Ismaaciil Maxammad Nuurlih ykkeh yane. Amaa garaa lel, katayneh kab sinah ishna.

Essero: 2015 dhishshimte zizzaalet agle liitiniinim kiyo eerhegeh aniyom. Ta agle, zoobaako ayidhdha le? Agle dhishaanamhi fayda lee ayim kinni?

Medebbo: Nanu zizzaalet



sabbatah Mandafaralle yomxowwe darsedde nengeleh nine. Amaa diraasa beyteh diikalle gaxtemko kinni lel, amaa mablo temetem. Agle maabnaho, yaanam temeete. Agle takko fadhdham lel, qusma tekkemhi sabbatah, 2015ti Gimbot alsadde, zizzaalet agle dhishno dhicne. Kaado fanah lel, 13 yakke wakali asxadaadarko yemeete 107 zoobayto le agle tekkeh tane. Sittiyadde lamma gabolle macnaaha, sugte qafof kee waqhti qafofko lel, wuli 750 takkem lino.

Essero: Aglet hadaf ayim kinni?

Medebbo: Ismaaciil-Inkettiino xayla kinni. Tekettemko geyta nafaaca

nabatiya kinni. Nabih lel, doola akkinnan ciyodde ifartam agle dhishsho kinni aydukumussam. Agle dhishshemko, sittiyaalih tassebededele khibra tane. Amaylih diraasaati barnaamij nabatiya kinni. Nanu taariikhille, zizzaale nitiya kinni, meceetih tee naarhige narhxo kiyah, rummalle nemeetemko, tee minaarhige. Nanu mangih alle amneefeci sugnem, caydat qafo kinni. Caydat qafo, waqhtitiyaalih nable gedda lel, baskat orballe yakko, zizzaalet baclaalle amayidhdho maki. Xawal nokraace wayek sarrah, feera orbah xawalno kinni nelle tanem. Amay kinamhi sabbatah lel, caydat qafodde tine zizzaale waqhti baahe

qafodde tabishsho fadhdha gedda, akah yakkeekah kee farhishishsham tane. Amay geyto yekkemko lel, xalli agle abaanamadde busa kinni yanem. Waqhti baahe qafodde kee tee nuwi mangih irooko tamiitem kinni. Amay geyto yekkemko lel, agledde takatto kinni kolle tanem. Akkinnanti ishiishi araxah iro yedeesh kaa farhishishsham baaho mirhiicamhi sabbatah, agle abitah doola esserita. Doola lel, agledde tanem kinni aydukumussam. Aglet nafaacaako nabam lel, diraasa kinni. Zizzaale nitiya kinni, tee naarhige narhxo kiyah, nanu cilleh tee minaarhigem nuble gedda kino, naarhago dhicnem. Nidooda nubleemko lel, sahalah nafaaca akgeyto dhiictamah lem kee taarhigetiya zizzaale kinni. Nanu, tamxurruse macna le baarho malino. Nidifdif kee ninabra, ta naarhigetiya busa kinni. Basoh meddero liinine. Amay lel, waqhti aktillaabeh tinem tine tekkeh tane. Amay kinamhi sabbatah lel, dhayerkeeko nigargerto dhictam zizzaale busa kinni. Noolih racteh tanetiya, teyya kinamhi sabbatah, aaginah tee abnam kee alle namneefecem naarhago nekkemko lel, taakumem diraasa kinni. Cille meceetih tee naarhago nelle tane. Ta agle dhishshimtemik sarrah, irooko temeetemhi araxah gantah diraasa tomxowwe. Amaa araxah isheh teerhgeh, xiya tiyshidhdhigeh



salaaxa le arax tibbirhem kaafa midagooni. Ta aglet hadaf lel, tatiya kinni.

Essero: Agledde kee galeelimteemik sarrah yane barhsa aaginah tabliini? Cusub xaaja umman gedda, xiya ifanih mikabbatamhi sabbatah, erherhih aglet dhishimih uguuguta tinin waqhtedde, sin aseedefi yine andafodde lee aaginah noh caddossaana?

Medebbo: Abraahim-Yoo, zizzaale abo kee abbaako noolih sugte nitiya kinni, aknarhxoo kiyah, nidooda malammit ciyo kee maddaxit ciyoh kiyah, rummah aftiino akah toxeeh tee baclaasa misuginna. Orbi akkorobam balih abli misuginnooni nixiyaa. Lammah adooxa zizzaaleyta cari caazalle ciddah, baska baaha gedda taburbure. Aki gedda, niciyyo yaanah hel adday sugeenim,

meddero kee tee nabra kiyah, zizzaale nafaaca le yaanah mango xawal adde aba miyiniini. Nanu, erherhih zizzaalet darse beyneh nemeeteh, nudrusem xiyaah warishne gedda, nitaabbem geyno mirhiicino. Nimujtamac cusub xaaja ifanih mikabbaata. Doola amayko basolle waqhti baahe qafodde akah toxee. Erherhih alle temneefecem laakin, mitine. Daddagumuh laakin, qalamah nudrusem abittoh ten nayballaw erherhishne. Zizzaale aaginah sigtam, teyyah yakko missil baclaa aagina yakko alle yanem, baclaa geyta gedda taxaw dhicta nafaaca, baclaa wayta gedda khasaaraako tasaadafo dhictam, amay balih sugtetiya kee waqhti baahe qafodde barhsa....a.ra inkoh tablem abittoh ten naydaraso erherhishne.

Masalan nardelle rob adde rada waqhti urhurhtiya kinni. Ta urhurh waqhtedde, sugte qafodde yane zizzaaleyti baska abo, dhiica waqhte migeyamhi sabbatah, xanane kiyah, baska mangoyya geytima masugo. Waqhti baahe qafodde laakin, ina aganalle akah awce waytaakah manfiyo fanadde aktanemhi sabbatah, guba xanane abitta gedda, agana baska abta. Sugte qafodde amaaginale cijaajinna adde abeenih addalle akah barhsimtaakah timcikkineh tine. Tekkem laakin, maslaxo. Ummanti lamma qafohi

barhsa cille meceetih abittoh ishintih yablo dhiicemhi sabbatah, kado mece darajalle nane narhxo dhicna. Agle dhishshiima tine gedda, inketta kee lamma liitine xiyaa, ta tillaabe lamma iggidadde, lix kee malxinko tabteh 10 zizzaaleyta guftem tane. Nanu lel, naarhigemko suumunnam malino. Wakale wakaleh adiih yakko, cindhamaso kee darasat aglet araxah diraasa umman gedda kino naxayem. Xiyaw takkeedo, meceetih



tifhimeh tane. Waqhti baahe qafolle nubleemko, waqhti lee yoxeemko, inki dayimille 15-25 kiilotiya baskaako akgeyno dhicna. Sugte qafooko laakin, amayidhdha takkem migeytimta. Amay ayehe nemko, zizzaale, le waqhte xanani abittodde tillassamhi sabbatah kinni. Xiyaa lel, nafaacaako adde tanem sinninitih yubliinih awwalah carwadde cideenih yinin sanaaduqh nafaacadde ashisha kee fahaama feerishak adii yanin aknarhxo dhicna.

Essero: Cishli yammange gedda, ina hinnim lammalle hayto dhiicimam tookomiinih yoh warishsheenih tinin? Tay aaginah takkem kinni? Amay balih, caydat qafodde zizzaaleyti baska abo ayidhdhole waqhte akbeya? Ayehe kinni lee, xayisha orba akah baahe waam? Waqhti baahe qafu lee teeko aaginale dooro leh kinni mango baska

abtam?

Medebbo: Ismaacil-Talle barhsah tanem, caydat qafu taymadaaxago siria. Zizzaaleyti, ay aba yanem taarhago mirhicta. Xanane aba yanee, woole miyane? taarhago mirhicta. Amay ayehe nemko lel, alfimtetiya kinamhi sabbatah kinni. Waqhti tiya laakin, max-maxah zizzaaleyti abamko takkana macnaaha, kaafadde cide lalimta gantah fakteh tablo dhicta. Nabih lel, ina tane, mitane? dhalo le, male? Kaa gondo cille meceetih taarhago dhicta. Tamaa waqhti baahe qafu xaboz masaanicidde yekkeyya isheh fadhdhe ginah teyyeeceh aaginah yanem tablo kee taarhago dhicta. Ta xusa sugnemko takkana, caydat qafodde dhiicimtam maki.

Inki zizzaaleyta lammalle hayto fadhdhemko, zizzaale ishi cilme macnaaha Saynis leya. Nixiyaa lel, abban

jaddan helishan zizzaaleeko tay aarhigi miyiniini. Inki zizzaaleyta lammah adooxalle hayto dhicta. Aaginah temko, zizzaale thabiicaako ina waytemko isheh kinni ishiina abittam. Inki zizzaaleyta lammalle haytemko, wulitiyaalih ina racta, aketti lel ina hintiya yakke macna kinni. Ina hinti, ina abito ciloh takko missilam kee eelih beyto kolle tanem tane. Zizzaale ina akbaddemko hido lel, ina aalle waytemko, ulah inah barhishshe lalimti yane. Kayyah yakke baclaa

kee ulah bettishsha mece macaashah isheh ina akah takko abta xawalah ishiina isheh abitto dhiica. Amay laakin, akkinnan waqhtedde takkem makimhi sabbatah, waqhte dhawudhdham farhshishsha. Basoh Sancafi cindha zooballe, doola ta mujtamacah 10,000ko feera qafu amaaginah akah toxeeh tine. Yakko kiyah, amaa xiyaa amayelle tamnaafaco mirhiicinna. Amay ayehe nemko, taakamo missili tinem irhga kiitine. Amaa gedda, ta mujtamac irhga liimiyyine. Kaafa yeerhege gedda laakin, amaa nuwaa waytime.

Abraahim eddosam lel, awwalah sugte qafu kee waqhti tiyahi barhsi nabatiya kinni. Kaado taahqaco fadhdha gedda, basoohit qafu tamaqqaco siria. Waqhtiya laakin, dagah yakko makiinah tooqhocemih kokmiradda. kaafa lel, waqhtedde temeeteh

tanem amay kinni. Zizzaale meddero balih, fursuusa kee zazcisha feera orba akgeyto dhicta. Zizzaale narhxe gedda, labcadah abba hido shuum kinni narhxem. Rummi laakin, amaatiya maki. Tamaa shum hido abba akkay naneti, labtiya akkinnexah saytiya kinni. Shuum narhxem hidhdhah lel, ina kinni aknarhxo nelle tanem. Shuqhli zizzaale lel, saam kinni. Candur lel, labam kinni. Zizzaale amooko adooxalle kinni xazzimtam. Ina kee shaqqaala inkoh saam kinni. Candur lel, labeeto kinni. Nookomesh tay kino, nabbarho nelle tanem. Kaado ina lamma caynah lalim kinni ciddam. Ama lammaako lel, saam kee labam aktawce. Amay lel, xananeytalle yakke intitko kinni barhsimtam. Amay inkoh abtam shaqqaala lel, kinni. Candur farhshiisha gedda, fidin intile aba. Saam lel, farhshiisha gedda, exeew ta intile abta. Ina xeewinidde sayishsha gedda, sittiya yabbirheh yamweesebe gedda say jinse yakke. Fidintiyadde hayta gedda laakin, labeeto hido candur yakke. Umman tay akkihi, amaa saacadde bettimta macaasha jinsi ayfalaadde ishafto leya. Adooxa max fanah zizzaale xangalko raxishsha xanah iggidin (Royal jooly) akyan macaasha betta. Mafarrit maxak sarrah, candurta kee shoqhli zizzaaleh bukke kee baska akah ossa. Ina takko yekkemko laakin, nookomesh ay sugne (Royal Jooly] mece macaasha

akmitasqiyyire. Abayshimo fanah akah yamxawwe. Nixiyaa laakin, erherhih adde hayen ina amaaginah martam kinon yakkaliinim. Zizzaale laakin, ina temcellemko, tassiqhiyyire. Ishi tamcalle gedda, xanani daggowa. Ishi takkeedo dhirhiiyta fermooni akyan mece uri tee emcellih daggowa. Amaa mece uri anqusi yadiye gedda lel, tee tagdife. Teyya akah tagdife xibar kee arax yakkeedo leya. Teyya felishsham shoqhli zizzaale kinni. Tamcalle gedda lel, makartah macaasha alle kalitta. Cusubtiya akah tagmirhem fanah laakin, tee mitagdife. Amaatiya tinjixem table gedda laakin, tee tagdife. Amay akah abtam lel, ina yakke lalim inikko aykee maddaxit max fanah tamiitem kinni. Amaa lalim adminekkah tommookomesh barroyte ina mitagdife. Zizzaaleyti barhsa abno farhna gedda, amaa lalim kino xaxxaznam. Wuli lalimta wuli qafodde, wulitiya wuli qafodde, maddaxa lel maddaxit qafodde kino haynam. Barhishna gedda, ta lalimti adox yanem selno nelle tane. Ina edracte qafu feremooni akyan mece urih sabbatah, ina eelih tanem tamidhdhige. Oohim laakin, amaa ure waa gedda, ina eelih mitanem yamidhdhigemhi sabbatah, ishiina isheh siraxita. Mango inon lel, siraxima. Amayko tanjixem laakin, afalle tawcetiya busa kinni. Amaatiya akah tewcemko, akim isheh masxisha. Ina xananeeko

tawco 15-16 maxtiya akbeya. Shoqhli zizzaale, 21-22 maxtiya, candur lel, 22 -24 maxtiya xananeeko yawco akbeya. 16 maxtiyalle tewce ina, affara maxak sarrah qafot buklalle helhelta. Makawwanit max hido lixya maxalle lel zarah tadiye. Candur alle suga mudhdhug kin makaanon yane. Amalle tadiyeh tanzirriye. Ishi, zarah qafooko tawce gedda, tayyaace ure leya. Amaa uri ayeh adii tanem tuumarishsham kinamhi sabbatah, sarradde akkataytam male. Alle tedeelle, 11-12 yakke candurlih geytimta. Eelih geytiminnan candurta lel, akkanish bada. Amayek sarrah, ishi qafodde gaxta. Cumreeko lemihi amaa maxadde abte zarah kinni sugto dhictam. Iroh tedee maxadde, candur akdaggowemko, malammit max tawco caashir leya. Akke wayemko laakin, malammit max akah tawcem male. Inki max abte zari miliyoona kinni yakkem. Amay ayyaacihi lel, zizzaalet aniina taydoome. Tayko bextih, ina qafooko akah tawcem male. Tayko ugunneh, zarah tedee ina gaxtem kee migaxom taarhago yekkemko, lacin wakalelle 24 maxtiya, dhamxin wakalelle lel, 28 maxtiyaako adde boodneh xanane aba yanem selno nelle tane. Nanu tay abittoh nublem kee abnem kinni. Xanane tublemko kito lel, zizzaaleyti yoh yekke tarhxo dhictam. Amayti ishaara ablekkah laakin, zizzaaleyti yekke aknarhxo mirhicna. Katattaya

Sin farhi: 1^{ti} xak

Wiliyaam Sheekispiir Birihaaniyat barha yekkeh, 1564h Istirafordi akyan madiinalle yooboke. Ta kattaab tahiya, 400 iggidiyaako basolle caalamah yitbirrice kitaabinnat ciyo, kazzik adde taatukem hinam kee kaadoolih sirii dhamto lem kinam tamidhdhge. Sheekispiir, ishardeeko awcekkah, umbaka caalamti zifralle yane ummat cayda kee nabra yakko, taariikko inkim akxabekkah, yaktabo dhiice sirii dhicle kattaab kiiyine. Sheekispiir, rabamko basolle, wuli 39 yakke kutuub caalamah yitbirrice dhicti bacila kiiyine. Amayko wulim lel, cayda, aymangadit kee kitaabinna kiitine. Kaa abitto lel, usuk akah yuktube Ingiliiz luqhaako akimille anturjumi, filmit tekkem yakko, kitoob tekkeh tiqhreemhi qalbedde xabe zikra xadde male. Nanu lel, ta caalam, waqhti kitaabinna kee cijaajinnaalih yeysherheerhege sheekispiir kitaabinnaako dorne, “Sin farhi balih” amoytähle dalta kab sinah ishneh nane, kayrele qiraayat waqhte!

Kalxa, Faransaati ardeeko wuli wawalille, Federik akyan, wuli arde ishi gabadde le amiir yine yan. Ta amiir tahiya, kaa afadde amaa dikih malik kiiyine ishi sacal reezaako

hadane. Reezaako haddanime malik, ishe kee kaa taamine caskarko daguu maraalih Ardan akyan mirixtah yane dat garab fanah dule. Kaalih liiyinin kaxani sabbatah, yedderiinimko takkanna, ishi sacal reezaako hadane Federikih xabeenih kaalih dulte jamaacaalih alle yedeyinille, marto aleef yeenih erherhishen. Adoobah kas xabe Federik, ummanimik ishi bada abiteh oddooniya baxar akah tekkeh tine.

Dulooh garabadde sige malik kee kaa jamaaca, reezadde anih liiyinin mece nabra kee mece barko zibo kin dabbatalle tillaasan nabra ummanimko aganalle eelih tittifiqheh, xisaab kee ciqhaabko huf ishiteenih raaxadde mara yinin. Xagaa waqhtedde, naba xorhti gerille defeya, gadwadde ooba kee xangolulle awci, makhaaliqho ishi canaako milte thabiicat gaddaalih, boocimta gadwadde layeelih tarde caasa, xeelaatih yadiye mece walwallih kimbirti anaashiid dhacammoyshiita, bani-aadamti isheh iggidin bani-aadamtolle yabrhiye cagab nabaatih biyashshiiteenih yinin. Zibi bahaayimlih ummanimko feera kaxano dhisheenimhi sabbatah, wayrhel kee gabutlih erherh waqhtih xuggaane loonimih iggidi yinin. Dattummih iggidin dhamxin

karma temeete gedda laakin, malik gedcatite. Rob, dhamxa, kalla kee atseebar, nabse taskirdidem, kee laxuudde kaa ciddo dhictam yakko kiyah, “jaza hin bani-aadamti thalumeeko yolle miyaame, yimacalsitteh yixiyaawinna taqhaaso temeetem inni soxobah kiyo ablem” tarhxe mablo liiyine.

Malik, mece nabraako barhsimeh, nabse gidcatishsha nabradde saw kibah, tillaasa uma bar, akkinnan ufayleyta tasaadafo dhicta cakanaako dagum balih beeh mangum akyadraso dhiicam ishaddaako aamini yine. Dharhaa shashaaxa, kibirti nashiid, xangolko boociima weeca, sittiyahi amoo amodde yane dhayit kee koomam kee baarhot indhirheeko geya nabsi wina kee rufto xadde liimitine.

Reezaako haddanime malik, Rooziland akyan inki barhä liiyine. Tamaa raxmatta hin Firederik kaa sacal laakin, teyya abbaako bukkuseh, Siliya akyan inkettähle ishi barhähi digirisheena akkabeh yine. Inki zambe hin lamma barhä laakin, ten abbob sittiyak aba yinin cangiino inkimide loyekkah, nagbi rummah akyengeleh xan kee lay yekkiinih yinin. Siliya, tee abba Roozilandiiiti abbakke abe cagab aarhigi tinemhi

sabbatah, ishabbah sacalih barhäh sirii anoono akah abatine. Roozilandi zibolle yane ishabbah xunsuusa taxesebe gedda, amaa xisaabko ticrhiyeh ishi basoohittiya takko, Siliya dhictamko takkanna akah abatine.

Wuli dhaxine, Siliya ishi baso balih Roozilandiilih wagroyshiita, tee abbaako farto alletemeete. “Farhiteellinimko, koo kee kusacla dufla alle takke malik makaanohi addalle tane boorhalle, Resliin tabloona amuwa” aytine amaa farto. Siliya, abbat farto lacinih kabbatte. Ishi, amaa dufla, Roozilandi xisaabko tayyaaco takko kinni, yaanam qalbedde liitine. Amaa waqhtedde akki tine dufla, amaa waqhtih moloka kee ten sayyo kixinon riyaada kiitine. Siliya kee Roozilandi lel, sittiya yibbirhiinih dufla alle takkole boorha fanah yedeyin. Amaa takkole dufla, ayidhdha cilishtiya kee sirii tanto letiya kinam sinnintih yabloonalel, sirii farhi liiyinin. Yakko kiyah, amaa dufla, umman ginah sittiyaalle amiitinnexem kee inkinnah sittiyaah eedinnexe marih fanalle takkem kinam seloona waqhte akmibeyinna. Amaa duflah tinqirribemko wuliti, caguura kee dherh waqhtih labcad letiya kiiyine. Ta caguura kin xiyawti, duflah eelih tassirhibbirhe xiyaako mango marih nabsi fillak akyanetiya kiiyine. Oo malammi laakin, kaalih adiinnexe lawarhwarh ya cindhamasoyta kiiyine. Amaa boorhalle dufla tablo temeete

xiyaa, amaa cindhamasoyta yublin gedda akkanih xangaladde aktemeetem tinniyemko, caguuraako yaysho mirhiicamhi sabbatah, kaa sarra rabi busa kinni yaanamalle abaasaanam kiitine.

Malik, Siliya kee Roozilandi ishelle kaab isheh, “yibarhä kee yisacalih barhäh takkole dufla tabloona temetiini? Tandufulem sittiyaalle tamiitem makinnoonimhi sabbatah, mabsuuth takkoona kitin. Tamaa cindhamasoyti laakin, rummah yiraxmatisheh yane. Ta duflat ammakaakamko kaa raacishshaanam lel, farhe dhaarhe. Iski sin yaabbeedo mitamidhdhige yicado cindham, tedeynih kaa dhaacima,” akyerhxe. Siliya kee Roozilandidde, malik waani rummah basak adde terhxe. Siliya tookomeh amaa cindhamasoytak, “kaafit dufladde mangalin,” teh kaa dhaacimte. Roozilandi takkeedo, xishma kee adabehe, ishi canaako kaa dhaacimte. Amaa gombi laakin, niyeh adde sayemko sarralle akah gaxam malem kee ishi dhic yayballaw uguteh yanem, carhamecoyta kin Roozilandi akah caddooseh, kaab adde yeh, “koyyah iggidin carhamecoytat dhaacimto cabbaroosemih, nabsedde umam yokkassaabbi tanek, yolle mabbarhin. Takke dufladde lel, ishi mece niya kee intih waacinsitnan yok masuumutin. Akkinnanim tekkeh umsullugemko, qalbedde basak yokmiyaam mudhdhug kinni. Rabemko

lel, rabih ookomeh inqirribeh aniyomhi sabbatah, yirabile wectam mawaa. Yirabi lel, caalamko taynuqhusem male. Caalamalle, daribih xabem mayyo. Caalam esxeeweh aniyom aarhigemhi sabbatah, anu tillaaba gedda, yicara yooko ummanimih tayshem taxaalafo dhictam seleh aniyo,” yerhxe ay cindhamasoyti nif cereeregishak. Duflah qurrub kinam lel akah caddoose.

Ay caguura kee cindhamasoyta, dufla erherhishen. Siliya ishille, amaa cindhamasoyti yamizziyemko, ishi canaako yalla dhaaca tine. Roozilandi laakin, caashir akyamco attiminnii, amaa gombi xibabbar kee gondo akkinikke aarhige waytemih, tee nabseelihle madhdhaadde axeesebi tine. Qalbi akrhaggitemhi sabbatah lel, kayyalle obto dhicta aziyadde busa amxeesebi tine. Gamooko, tee qalbe yigzee kaa kaxanoh nabsi akwuli xaaliteh abtam kee xabtam sodhdhe. Ay gombi laakin, amaa saytot lamma akah aben aydukumusnanah uluc qar ishiteh, tablem taamano tanta cibra kinam abam erherhishe.

Firederik, gombi aybulluwi yine fidbe kee xibarah mangum xedeneh yinemhi sabbatah, amaa gombi maabako kee dik jaarhago farheh, xiyaa essere. Migacah, Orlando akyaanam, kaa abba, Rowlandi Deboyis akyan hababale xiyawto kiiyinem kee Orlando kaa xiddagliido kinam lel, yeerhege. Rowlandi Deboyis akyan, amaa gombohi abba,

daguu iggiditko afadde rabem yeerhegemik sarrah, akkanih amaa gombolle liiyine mece mablo cadaawalle timbiddile. Alle defeeh yinekkeeko uguguut yeh adii, xiyaa kaa sacalah le xishma kee mece xussum rummah cur adde yoo kiyah, amaa gombi agiirinna laakin, qalbeeko akah tacrhaw mirhiicinna. “Araxadde adii, ta Orlando akyan cindhooki aki marih barha yekkeh yakkeedo, ayidhdha micitine” ay nabsedde akyunkulluqhe nacabo ishaamo gabat addaacasah aatuki, aybulluwi yine.

Ay agiro kin gombi, tee abbahi kaxantooli barha kinam teerhege Roozilandi, ishi canaako xedente. Siliya akyan abbat sacalih barhāk, “ta gombih abba, yabbahi saaxib kiiyiniinim oobbeh, qalbi rummah basak yoh yeh yane. Male kohishe, yabbah saaxibih barha kinam ookomeh aarhigeedo, tayidhdholemidde saamko, walaa lakalle akkoobeh, gulub akkibbirheh kaa dhaacime dhaariho” terhxee Roozilandi naxruurak. Ay saytot lamma, inkidde Orlando fanah yedeyin. Malik waani kee koolafah kas xabeh akah sugemhi sabbatah, kaa alaaliyeenih sinni meela fanah gaxa, Roozilandi arax abrhadd xabteh amaa gomboolih zatteyto leddelle gaxte. Filladde liitine dahab katiina teyyeeceh lel, “yacasaayya ta katiina filladde koh hawok daagum cunuun yohee. Geyam akkeedo gantah tayko fer koh abe dhaariho. Gabadde yok tanem

laakin, teyya busa yok tekke,” akkay, mususuu akah terhxee.

Roozilandi kee Siliya caredde ulah yekkin gedda, Roozilandi waani, erhedhdhamko aykee abayshimtandah Orlandi zacabah busa kiitine. Siliya takkeedo, Roozilandi gombi kaxanoh tumrurueh tanem selte gedda, “kiyah atu nagaa letiyā kito? Taabbem le aykokta? Alle taarhige gombo lee kinni? kaa ubleekah kaa kaxanodde taginah tasrurem? Kattee, xiyaa ay yoktaa erhex” akte. “Kaa abba kee yabba mangum sittiya kixini yinin,” tih alle tedebe Roozilandi. Siliya lel gabbacteh. “Ibaal? Kaa abba kee kwabba sittiya yakixinin gedda, atu kaa takxano laazim kinnihoo? Ta atu akah taakah yekkemko, anu amaa gombo ancabo yolle tane macna kinni. Ayeh temko, yabba, kaa abba kixini miyine. Yakko kiyah, Orlando farhetiya kee farhe marih barha yekkemih anu kaa minicibiyo” akte.

Firederik, Rowladi barha akah yincibem, ulah amaa gomboolih kaa geyshishshemih akkinnexah, reezaako hadane kaa sacalih soxoba kin omora lissac kaa agaagitille yaniinim aarhigi yinemhi sabbatah kee, ummat alle akkinnanille Roozilandih taxay xishma wuli gabooko, wuli gabooko lel, tee abbahi macaani xunsuusaanah mangom tee kixinoonim abli yinemhi sabbatah bisa kinni. Ta xiyaahi anoono lel, abbat sacal kin Firederik akah makxano.

Siliya kee Roozilandi,

Orlandooti sabbatah aban haasawa yoobbe firederik, nabsedde gira ak-hayteh adde yanin caredde gamooko hattuk adde yaado, Roozilandikke, “tacaredde tayek sarrah agiide kwaable? Isheh min. Ewec kiyo tacareeko kokkayik aniyom. Aduu ishabbadde kataa,” yaado careeko tawco tee yeemere. Siliya, Roozilandi teeko barhsimtemhi nacaboh ishappa dhaacimte. “Yacasabba, yallah koktakko inki gedda yoobba. Roozilandi ishappaako barhsimteh noolih racte waqhtedde, cindhik inemhi sabbatah, tee kaxano kee muruwwa qalbishiteh miiniyo. Kado laakin, sittiya labcadneh sacol nekke saacadde, Roozilandi ta careeko haddanimtam innah dhiicam maki. Kaadoole yacasabba, Roozilandi hinnim maro mirhiicaaki, ninni baso balih nakkok tee xab” akte weecah xinziqh ishitak. “Oobba te cindhooka, oobba, Roozilandi kooko ummanimih tayshe inti mecoyta kinni. Xiyaadde kab akah taakah kee alle akah raxmataanaakah abto dhicta lillig cindhooka kinni. Teyyah ay yolle abta dhaacimto lel, ayidhdha fanah duudiino adde teceedere sacayto kitom taybulluwem kinni. Roozilandi tacareeko tawcem, ayidhdha naba caashirih wanna kitom koh caddoyto kinni alle tanem. Tayek sarrah, ta cindhookahi sabbatah gulluc yodde tam mifarha. Ta cindhookahi gondodde adde migaxa, abayshimtem kinni,” ye malik xurtaameh wagubudde arak.

Siliya, Roozilandi tenlih marto hidhdhah ishabba dhaacimteh, abbaako raja wayte gedda, Roozilandi alle adiinnanille teelih tadaw abasse. Abbat reeza kee mece nabra adde tane malik care kee kaa nabra xabteh, Roozilandiil qaanuun araxah malik kiiyinemko sacal hadane Roozilandi abbat goronuh Ardan akyan mirixtah yane zibo tadaw abasse. Gerhoh ugutaanamko basolle laakin, malik caredde akah yinin xibar kee sarsaritlih yadiin gedda, araxadde ten yasaaf dhiica andafoko akah naggowoona dhiicaanamadde, sirii ginah zatteen. Abayshimolle lel, “barri saytot sarsarit abinnemko nirhaftam male,” ta mablo Siliya bahte. Roozilandi lel, ishuulaako lamma tenko wulitiya labtiih sara sarittam, ninagaytadde ishi gide taallo dhicto kinni, ta mablo bahtemhi sabbatah, lammih baahen mablolulle yittifiqhin. Roozilandi labtiih sarsarit, Siliya lel sarsariti barri barhah tammangado abaasen. Araxadde gamooko xiyaa ten esserta gedda, sacal kee sacla kino, yoonaa yakkeedo yeerhegin. Roozilandi Ganimaad, Siliya lel, Alyaana ya migac saritoona lel, abaasen.

Roozilandi labtiih sara, Siliya lel, barhah sara sariteenih dherh kallaaxeh uguten. Alle adii yinin Ardan akyan baarho, Firederik gabaddele baarhooko mirixtah tane makaano kiitine. Ganimaad ya labtiih migac ishek hayte Roozilandi, labtiih sara ishelle hayte gedda, igric

ishen cindha gomboytah timmingide. Rummaahit tee kaxantole kee tee caseena, teyyah ay teelih dherh baarhohi kallaaxeh uguttem lel, rummah qalbedde basak akteh tine. Gamooko ten tablemidde sacal kee saclah iggidi yiniinimhi sabbatah, akim adde baaho dhiicati miyine. Roozilandi, sarsarit kee xibarah labtiyah timmingidem, osat xeden kee fidbe akah toxeeh sirii niya tee qalbe awrarteh tine.

Ullo kee daabob awcii kee ooba, dherh arax yedeynimik sarrah, Ardan akyan baarhoh kab yen. Araxadde adiih madiinah dhay makaanonulle geya yinin tamuccubem kee bettimtam Ardan baarholle mitinemhi sabbatah, tanto kee safra sittiya alle geyteh xumuu yoonaa taanen. Toyidhdhole arax, mece haasawa kee gudaclih aysussuli yine Ganimaad tantoh gox yemhi sabbatah, iraareh yine fidbe kee labhattiino adde yuybulluwegh yine labtiih sara cideh barhah balih weeco farhfaarhe/ yemmegeemege. Alyaana

takkeedo, kayya balih safra kee tantoh gerho tante. Ganimaad sariteh yanem labtiih sara kinam sele gedda, saytiya tayfidibem labtiya kinni yaanam qalbedde aktemeetemhi sabbatah, ishi saclakke “aydukum, abshir uluc qar ishit, yalli yaarhige haaki, Ardanko dherhille minaneeki abshir, ta alle nane baarho fandha baarho akkinnexah miractaaki, raja magracin. Mango maxaaxilko tabneh nokrachteh tanem dagum kinni,”

akye Ganimaad.

Lammi laakin, sinne sinneh aban aydukumaaka inkimidde akah assam kiimitine. Ardan akyan garabadde addah oroobona kiyah, malik cibkah adde yane makaano yaarhagoona mirhiicinnooni. Ta lamma, ten abayshima carha taamo dhictam af faakeenih sittiyah warishe woona kiyah, sinni sinnille ten asxeesebi tinem kiitine. Codhdhole garabhi addalle baahen sakay bakeenih, culul kee arax sorhah akuulalle yedeynih aluutoona dhiicaanam cille meceetih aarhigi yinin.

Dherh arax kee sirii tantok sarrah, garab addalle tine bartholle iba kee gaba cideenih alle yucrufinille, saadifiha baarhot barhi ten agaagaako tillaabah intidde akrade. Ganimaad, labtiih xibabbar kee fidbeelih alle cidditeh yinekkeeko uguut yeh, “kwe yicado sacalo, ta inkim alle anniinexe bartholle yoo kee yisacla ta akah nitable xibarah nane. Kaadoole yicado sacal farh ishshem koh abno kinoki, yalla kee koyya bettimtam kee tamuccubem alle geynakke fanah nibee. Akah tableekah lel, ta yisacla arax tantoolih macaasha dhaginnexah gab teh tanemhi sabbatah, tayek sarrah mangum kalto mirhictaaki yicado sacal, ta kokkamah nigarger,” akye raxmatisha xibabbar kee waanah.

Jamaal Maxammad
Axmaddiin

Xoosal**Sawalime kalimam****Nibro 4ti medebbob**

1 q	2 a	3 r	u	u	4 r	a		5 u	6 s
7 a	r	a	r		a		8 a	m	o
a	k	k			a			9 a	l
r	a	h			10 x	a	l	m	a
e		11 b	a	l	a	s	a		
	12 x	e	r	a				13 a	14 b
	a		15 h	a	a	s	16 a	w	a
17 x	a	18 l	e			19 h	a	w	a
20 a	k	a		21 f		22 a	c	a	n
23 b	a	a	d	i	m		24 a	l	o
25 u	l	l	e	l		26 a	l	a	
27 z	e	e	r	a			28 e	h	

Cusubam

1	2	3	4	5			6	
7						8		
9					10			
11					12			
13								
		14	15			16		
	17						18	
19					20			
21				22		23		
24			25					

Maroorolle

1. Tamo (basaaka, cuura, muluuxa...)
7. Selima, calaama, gool
8. Nabsi dhmtah karimko tiya
9. Kurkuurin comboobale cindha xorh
11. Naqhuse, uma abrha
12. Watsam, lakti gerhoh andhax
13. Intile Ingiliiz luqhah
14. Ilaw alle yaskiyyidin cara
17. Azgagac/ashshataatak carabah
19. Iyriwwixa/ishrifa
20. Bar rada rob
21. Xiyaa dhalta tiyā
23. Darracah/waaxeltah narhxe kalima
24. Usuk/ishi _____
25. Waraddi adiik aba margadde

Ullolle

1. Cindhadhdha sawurud okolol yaarrin lay
2. Sirii lacnale xaaxayta
3. Garbi addah karim
4. duruga/wulitiih carha gaxa
5. Aktillaaban cara/arax
6. Ilaw, xalmit, khudaar daanishaanam
8. Weeci gadelle xaba xorh kee dharhuu
10. Gira hin mindad
15. Cafar afah amowa
16. Yaamire tiya/migac carabah
17. Nanu maadayinnino/mirabino
18. Mangih caafitille tawce biyaaket cayna
19. Unrhurh inki tufultadde waraarish
22. Maale yaanam Ingiliiz luqhah

Cabdu Maxammad

Sawwaag akxini

Amol casa ratso fanal caaguyin kaani
Gerko andharh corraadi saritte kunaani
Tsirgat afak daw aykubleh tillaakani
Weeli yol xarhite yolle feereh wini
Dhibrhod marak yine yafcaadoh fireeni
Dhamume hinirkel yiggirice akkanih.

Mirixta aqheesiyuk inni mizga abbarho
Kaxani taraafik tik cirhe kee zirhoh
Parking abo yixab yimirhirhiin igiirhoh
Yafcaado tandhammarho kaxani yagmarho
Kufanah tillaabok yoh ifish andharho.

Cirhe micnet sabbat akkay dhaarhek ayro
Antabe kee lace takkemko waye niroh
Wulim takkem fanah miggacoyshe Dooro
Tibbirheh aktaban zebra hin marooro
Geyinnanil daw yiishsha tekkeh semaaforo.

Anu dhayel kokkanik dherhirkel ifishsha
Mizga taywilliceh guralle cikishsha
Makiinat tsirde kinniho kaxani firashsha?
Wuli ged dhamaxta wuli ged afishsha
Ayidhdha takkeh kinni ta kaxani marsha?
Maxabbat gerhgerh yiyrihibirh sayishsheh warsha.

Kaxanol cagab baahak adiyeh follo
Gerhgerh kee farhiiko thiraa yokkab pollo
Garaajad hayteh fak yafcaado tam tablo
Matoor kee bitrool nekkeh qalbe nazzagallo
Kuyna kee yiina dheh ishishinno ballö
Kaxani qulfeh namadhdhaw noh yakkooki zeelo.
CabduMaxammad